



文
粹

和
338
ノ



文粹卷第十七上

吳興 姚鉉 纂

所讀
有物

詩十一 總五十九首
古調歌篇七

寺觀

始除尚書郎別善福精舍 韋應物

寄闍防 劉昫

題鶴林寺 薛據

題破山寺後禪院 常建

琅邪山寺 韋應物

簡寂觀西澗瀑布下作

五老峯大明觀贈隱者 姚係

石門墨山二山相連有禪堂道觀天下絕境 張說

題思禪寺 獨孤及

東坡學堂

利
291
4

仙遊寺有龍潭穴弄玉祠 李華
遊棲霞寺 顧況

廟社

四皓廟 元稹

魚山神女祠歌二首 王維

古社 元稹

邊塞

虜患 張陵

代北州老翁答 張謂

遼西 崔顥

書圖

王處士草堂壁畫衡霍諸山 劉長卿

題劉相公三湘圖 郎士元

觀于舍人壁畫山水 王季友

題遐上人古松歌 朱灣

畫竹歌 白居易

觀李湊所畫美人障子 劉長卿

古器物

石鼓歌 韓愈

古劍篇 郭元振

磨鏡篇 劉禹錫

贈友人古鏡 朱書

團扇歌 劉禹錫

樂器

彈琴 劉希叡

江上琴興 常建

聽蜀僧彈琴 李白

奉和張舍人閣中直夜思聞雅琴因書事 呂溫

聽彈風入松贈楊補闕 王昌齡

金陵聽韓侍御吹笛 李白

武昌老人說笛歌 劉禹錫

草木

題老張松樹 宋之問

古柏行 杜甫

與東方左史虯修竹篇 陳子昂

種竹 元稹

竹徑偶然作 權德輿

露青竹鞭歌 顧況

暑日題道邊樹 王叡

井上桐 陸龜蒙

石上藤 岑參

兔絲 元稹

春草謠 顧況

禽鳥昆蟲

王兵馬使二角鷹 杜甫

觀放白鷹 李白

飛鳶操 劉禹錫

百舌吟

鸚鵡詞 蘇郁

鴛鴦篇 陳子昂

子規嘯 韋應物

鷓鴣吟 劉禹錫

春蟬 元稹

道路

江上蚊子 韋楚老

戲題關門 岑參

門前路 陸龜蒙

始除尚書郎別善福精舍

韋應物

簡略非世器委身同草木逍遙精舍居飲水自為足累日曾一柳
對書常懶讀社臘會高年山川恣遊矚明世方選士中朝懸美祿
除書忽到門冠帶便拘束愧忝郎署迹謬蒙君子錄俯仰垂華纓
飄飄翔輕轂行將親愛別戀此西澗曲遠峯照夕川夏雨生眾綠
迅風飄野路迴首不遑宿明晨下煙闕白雲在幽谷

寄閩防

時在終南山豐德寺讀書

劉昫虛

青嶼南山色君與緇錫隣深路入古寺亂花隨暮春紛紛對寂寞
往往落衣巾松色空照水經聲時有人晚心復南望山遠情獨親
應以脩往業亦唯立此身深林度空夜煙月資清真莫歎文明日
彌年從隱淪

題鶴林寺

薛據

道門隱形勝向北臨法橋松覆山殿冷花藏溪路遙珊珊寶幡挂

啖啖明燈燒遲日半空谷春風連上潮少憑水木興暫忝身心調
願謝攜手客茲山禪侶饒

題破山寺後禪院

常建

清晨入古寺初日明一作照高林竹徑通幽處禪房花木深山光悅
鳥性潭影空人心萬籟此俱寂惟聞鐘磬音

琅邪山寺

韋應物

受命恤人隱茲遊久未忘鳴騶響幽澗前旌耀崇岡青冥臺砌寒
綠縹草木香填壑躋花界疊石構雲房經制隨巖轉繚繞豈定方
新泉洩陰壁高蘿蔭綠塘攀林一棲心飲水得清涼還歸坐郡閣
但見山蒼蒼

簡寂觀西澗瀑布下作

淙流絕壁散虛煙翠澗深巖際松風起飄飄來灑襟窺蘿玩猿鳥
解組傲園林茶果邀真侶觴酌洽同心曠歲懷茲賞春行始重尋
聊將橫吹笛一寫山水音

五老峯大明觀贈隱者

姚係

雲觀此山北與君攜手稀林端涉橫水洞口入斜暉乍覺鸞鶴邈
忽為煙霧飛故人清和客默會琴心微丹術幸可授青龍當未歸
悠悠平生意此日復相違

石門墨山二山相連有禪堂道觀天下絕境

張說

菌輪江上山近在華容縣常陟巴邱首天晴遙可見佳遊屢前諾
芳月愆幽眷及此符守移權言臨道便既攜賞心客復有送行掾
竹徑入陰窅松崖上空蒨草共林一色雲與峯萬變探窺石門斷
緣越沙澗轉兩山勢爭雄峯巘相顧盼藥妙靈仙寶境華巖壑選
清都西淵絕金地東敞宴池果接園畦風煙邇臺殿高尋去石頂
曠覽天宇徧千山紛滿目百川豁對面騎來雲氣迎人去鳥聲戀
長揖桃源士舉世同企羨

題思禪寺

獨孤及

溪口聞法鼓停橈登翠屏攀雲到金界合掌開禪局鬱律眾山抱
空濛花雨零老僧指香樓云是不死庭眇眇于越路茫茫春草青
遠山噴百谷繚繞馳東溟目極想何在境照心亦冥驕然諸根空
破結如破餅下視三界狹但聞五濁腥山中有良藥吾欲墮天形

仙遊寺有龍潭穴弄玉祠

李華

捨寺入樵逕雲木深谷口萬壑移晦明千峯轉前後巖然龍潭上
石勢若奔走開坼秋天光崩騰夏雷吼靈溪自茲去紆直互紛糾
聽聲靜復喧望色無更有冥冥翠微下高殿映杉柳滴滴洞穴中
懸泉響相扣昔時秦王女羽化年代久日暮松風來簫聲生左右
早窺神仙籙願結芝朮友安得羨門方青囊繫吾肘

遊棲霞寺

顧況

棲霞山中子規鳥口邊血出唬不了山僧後夜初入定聞似不聞
山月曉

四皓廟

元稹

巢由昔避世堯舜不得臣伊呂雖急病湯武乃可君四賢胡爲者
千載名氛氳顯晦有遺跡前後疑不倫秦政虐天下黷武窮生民
諸侯戰心死壯士眉亦顰張良韓孺子椎碎屬車輪遂令英雄意
日夜思報秦先生相將去不復嬰世塵雲卷在孤岫龍潛爲小鱗
秦皇轉無道諫者鼎鑊親茅焦脫衣諫先生無一言趙高殺二世
先生如不聞劉項取天下先生遊白雲海內八年戰先生全一身
漢業日已定先生名亦振不得爲濟世宜哉爲隱淪如何一朝起
屈作儲貳賓安存孝惠帝摧頓戚夫人捨大以謀細蚪盤而螻伸
惠皇竟不嗣呂氏禍有因雖懷安劉志未若周與陳皆落子房術
先生道何屯出處貴明白故吾今有云

魚山神女祠歌二首

王維

迎神

坎坎擊鼓魚山之下吹洞簫望極浦女巫進紛屢舞陳瑤席湛清
醑風淒淒兮夜雨神之來兮不來使我心兮苦復苦

送神

紛進拜兮堂前日眷眷兮瓊筵來不語兮意不傳作暮雨兮愁空
山悲急管兮思繁絃神之駕兮儼欲旋倏雲收兮雨歇山青青兮
水潺潺

古社

元稹

古社基阯在人散社不神唯有空心樹妖狐藏魅人狐惑意顛倒
臊腥不復聞邱墳變城郭花草仍荆榛良田千萬頃占作天荒田
主人議芟斫怪見不敢前那言空山燒夜隨風馬奔飛聲鼓聲震
高燄旗幟翻逡巡荆棘盡狐兔無子孫狐死魅人醒煙消壇墍存
繞壇舊田地給授有等倫農收村落盛社樹新團圓社公千萬歲
永保村中民

虜患

張陵

今日漢家探使回蟻疊胡兵來未歇春風渭水不敢流總作六軍
心上血

代北州老翁答

張謂

負薪老翁住北州北望鄉關生客愁自言老翁有三子兩人已向
黃沙死如今小男新長成明年聞道更徵兵定知此別必零落不
及相隨同死生盡將田宅借鄰伍且復伶俜去鄉土在生本求多
子孫及有誰知更辛苦近傳天子尊武臣強兵直欲靜胡塵安邊
自合有長策何必流離中國人

遼西

崔顥

燕郊芳歲晚殘雪凍邊城四月春草合遼陽春水生胡人正牧馬
漢將日徵兵露重寶刀溼沙虛金鼓鳴寒衣著已盡春服誰與成
寄語洛陽使為傳邊塞情

王處士草堂壁畫衡霍諸山

劉長卿

愛此衡霍近卷簾如可攀能令堂上客見盡湘南山青翠千萬狀
飛來方丈間歸雲無處滅去鳥何時還勝事日相對主人常獨閒
清陰滿四壁佳氣生重關頗與宿心會看看慰愁顏

題劉相公三湘圖

郎士元

昔別辭衡霍爾來憶南州今朝平津邸兼得瀟湘遊稍辨郢門樹
依然芳杜洲微明三巴峽咫尺萬里流去鳥不知倦遠帆生暮愁
涔陽指天末北渚空悠悠枕上見漁父座中常狎鷗誰言魏闕下
自有東山幽

觀于舍人壁畫山水

王季友

野人宿在人家少朝見此山謂山曉半壁仍棲嶺上雲開簾欲放
湖中鳥獨坐長松是阿誰再三招手起來遲于公大笑向予說小
弟丹青能爾為

題遇上人院壁畫古松歌

朱灣

石上盤古根謂言天生朽安知草木性變在畫師手陰深方丈間
真趣幽且閒木文離披勢槎枿中裂空心火燒出掃成三寸五寸
枝便作千年萬年物莓苔濃淡意不同一半死皮藏蠹蟲風霜未
必來到此氣色杳似寒山中孤標可翫不可取能使支公道場古

畫竹歌 并序

白居易

協律郎蕭悅善畫竹舉世無倫蕭亦甚自祕重有終歲求其一竿
一枝而不得者知子天與好事忽寫一十五竿惠然見投子厚其
意高其藝無以答賦作歌以報之凡一百八十六字歌曰
植物之中竹難寫古今雖畫無似者蕭郎下筆獨逼真丹青已來
唯一人人畫竹身肥臃腫蕭畫莖瘦節節竦人畫竹梢死羸垂蕭
畫枝活葉葉動不根而生從意生不筍而成由筆成野塘水邊碕
岸側森森兩叢十五莖嬋娟不失筠粉態蕭索盡得風煙情舉頭
忽見不似畫低耳靜聽疑有聲西叢七莖勁而健省向天竺寺前
石上見東叢八莖疏且寒憶曾湘妃廟裏雨中看幽姿遠思少人
別與君相顧空長歎蕭郎蕭郎老可惜手戰眼昏頭雪色自言便
是絕筆時從今此竹尤難得

觀李湊畫美人障子

劉長卿

愛爾含天姿丹青有殊智無閒已得象象外更生意西子不可見

千秋無重還空憐浣紗態猶在含豪間一笑豈易得雙蛾如有情
窗風不舉袖但覺羅衣輕華堂翠幕春風來內閣金屏曙色開此
中一見亂人目只疑行到雲陽臺

石鼓歌

韓愈

張生手持石鼓文勸我試作石鼓歌少陵無人謫仙死才薄將柰
石鼓何周綱陵遲四海沸宣王憤起揮天戈大開明堂受朝賀諸
侯劔佩鳴相磨蒐于岐陽騁雄俊萬里禽獸皆遮羅鐫功勒成告
萬世鑿石作鼓墮嵯峨從臣才藝咸第一揀選撰刻留山阿雨淋
日炙野火燎鬼物守護煩馮訶公從何處得紙本豪髮盡備無差
訛辭嚴義密讀難曉字體不類隸與蝌年深豈免有缺畫快劔斫
斷生蛟鼉鸞翔鳳翥眾仙下珊瑚碧樹交枝柯金繩鐵索鎖紐壯
古鼎躍水龍騰梭陋儒編詩不收入二雅褊迫無委蛇孔子西行
不到秦倚櫺星宿遺義娥嗟予好古生苦晚對此涕淚雙滂沱憶
昔初從博士徵其年始改稱元和故人從軍在右輔為我量度掘

白科濯冠沐浴告祭酒如此之寶存豈多氈苞席裏可立致十鼓
祇載數駱駝薦諸太廟比部鼎光價豈止百倍過聖恩若許留太
學諸生講解得切磋觀經鴻都尙填咽坐見舉國來奔波剝苔剔
辭露節角安置妥帖平不頗大厦深簷與蓋覆經歷久遠期無他
中朝大官老於事詎肯感激徒媿嬰牧童敲火牛礪角誰復著手
爲摩挲日銷月鑠就埋沒六年西顧空吟哦義之俗書趁姿媚數
紙尙可博白鵝繼周八代爭戰罷無人收拾理則那方今太平日
無事柄任儒術崇丘軻安能以此上論列願借辯口如懸河石鼓
之歌止於此嗚呼吾意其蹉跎

古劍篇

郭元振

君不見昆吾鐵冶飛炎煙紅光紫氣俱赫然良工鍛鍊凡幾年鑄
得寶劍名龍泉龍泉顏色如霜雪良工咨嗟歎奇絕琉璃玉匣吐
蓮花錯鏤金環映明月正逢天下無風塵幸得周防君子身精光
黯黯青蛇色文章片片綠龜鱗非直結交遊俠子亦曾親近英雄

人何言中路遭棄捐零落飄淪古獄邊雖復沈埋無所用猶能夜
夜氣衝天

磨鏡篇

劉禹錫

流塵翳明鏡歲久看如漆門前負局生爲我一磨拂萍開綠池滿
暈盡金波溢白日照空心圓光走幽室山神祇氣沮野魅真形出
卻思未磨時瓦礫來唐突

贈友人古鏡

朱晝

我有古時鏡初自壞陵得蛟龍猶泥蟠魑魅幸月蝕磨久見菱蘂
青於藍水色贈君將照心無使心受惑

團扇歌

劉禹錫

團扇復團扇奉君清暑殿秋風入庭樹從此不相見上有乘鸞女
蒼蒼蟲網遍明年入懷袖別是機中練

彈琴

劉希戩

碧山本岑寂素琴何清幽彈爲風入松崖谷颯以秋庭鶴舞白雪

泉魚躍洪流余欲娛世人明月難暗投感歎未終曲淚下不可收
鳴呼鍾子期零落歸山邱死而若有知魂兮從我遊

江上琴興

常建

江上調玉琴一絃清一心泠泠七弦變萬木澄幽陰能使江月白
又令江水深始知枯桐枝可以徽黃金

聽蜀僧濬彈琴

李白

蜀僧抱綠綺西上峨眉峯爲我一揮手如聽萬壑松客心洗流水
餘響入霜鐘不覺碧山暮秋雲暗幾重

奉和張舍人閣中直夜思聞雅琴因書事

呂溫

迢遞天上直寂寞邱中琴憶爾山水韻起予仁智心凝情在正始
超想疏煩襟涼生子夜後月照禁垣深遠風藹蘭氣微露清桐陰
方襲緇衣慶永奉南薰吟

聽彈風入松贈楊補闕

王昌齡

商風入我弦夜竹深有露弦悲與林寂清景不可度寥落幽居心
颯颯青松樹松風吹草白溪水寒日暮聲意去復還九變待一顧
空山多雨雪獨立君始悟

金陵聽韓侍御吹笛

李白

韓公吹玉笛侖儻流英音風吹繞鍾山萬壑皆龍吟王子停鳳管
師襄掩瑤琴餘響渡江去天涯安可尋

武昌老人說笛歌

劉禹錫

武昌老人七十餘手把庾令相聞書自言少小學吹笛早事曹王
曾賞激往年征鎮戍蘄州楚山蕭蕭笛竹秋當時買材恣搜索典
卻身上烏貂裘古苔蒼蒼封老節石上孤生飽風雪商聲五音隨
指發水中龍應行雲絕曾將黃鶴樓上吹一聲占盡秋江月如今
老去興猶遲音韻高低耳不知氣力已微心尙在時時一曲夢中
吹

題老張松樹

宋之問

歲晚東巖下周顧何悽惻日落西山陰眾草起寒色中有喬松樹
使我長歎息百尺無寸枝一生自孤直

古柏行

杜甫

孔明廟前有老柏柯如青銅根如石霜皮溜雨四十圍黛色參天
二千尺君臣已與時際會樹木猶爲人愛惜雲來氣接巫峽長月
出寒通雪山白憶昨路遠錦亭東先主武侯同闕宮崔嵬枝幹郊
原古窈窕丹青戶牖空落落盤踞雖得地冥冥孤高多烈風扶持
自是神明力正直元因造化功大厦如傾要梁棟萬牛迴首邱山
重不露文章世已驚未辭翦伐誰能送苦心豈免容螻蟻香葉曾
經宿鸞鳳志人幽士莫怨嗟古來材大難爲用

與東方左史虬脩竹篇

并序

陳子昂

東方公足下文章道弊五百年矣漢魏風骨晉宋莫傳然而文獻
有可徵者僕嘗暇時觀齊梁閒詩彩麗競繁而興寄都絕每以永
歎竊思古人常恐逶迤頽靡風雅不作以耿耿也一昨於解三處

見明公詠孤桐篇骨氣端翔音情頓挫光映朗練有金石聲遂用
洗心飾視發揮幽鬱不圖正始之音復覩於茲可使建安作者相
視而笑解君云張茂先何敬祖東方生與其比肩僕亦以爲知言
也故感歎雅製作脩竹詩一篇當有知音以傳示之

龍種生南岳孤翠鬱亭亭峯頂上崇翠煙雨下微冥夜聞鼯鼠叫
晝聒泉壑聲春風正淡蕩白露已清冷哀響激金奏密色滋玉英
歲寒霜雪苦含彩獨青青豈不厭凝冽羞比春林榮春木有榮歇
此節無凋零始願與金石終古保堅貞不意伶倫子吹之學鳳鳴
遂偶雲龢瑟張樂奏天庭妙曲方千變簫韶已九成信蒙雕斲美
常願事僊靈驅馳翠蚪駕伊鬱紫鸞笙結交羸臺女吟弄昇天行
攜手登白日遠遊戲赤城低昂玄鶴舞斷絕彩雲生永隨眾仙去

三山遊玉京

種竹并序

元稹

昔樂天贈余詩云無波古井水有節秋竹竿余秋來種竹廳下因

而有懷聊書十韻

昔公憐我直比之秋竹竿秋來苦相憶種竹廳前看失地顏色改
傷根枝葉殘清風猶浙浙高節空團團鳴蟬聒莫景跳蛙築幽欄
塵土復晝夜稍雲良獨難丹邱信云遠安得臨仙壇沿瘴冬草綠
何人驚歲寒可憐亭亭榦一一青琅玕孤鳳竟不至坐傷時節闌

竹逕偶然作

權德輿

退朝此休沐閉戶無塵氛支策入幽逕清風隨此君琴觴恣偃傲
蘭蕙相氤氳幽賞方自適林西煙景曛

露青竹鞭歌

顧況

鮮于仲通正當年章仇兼瓊在蜀川約束蜀兒采馬鞭蜀兒采鞭
不敢眠橫截斜飛飛鳥邊繩橋夜上層崖巔頭插白雲跨飛泉采
得馬鞭長且堅浮漚丁子珠聯聯灰煮蠟揩光爛然章仇兼瓊持
上天上天雨露何其偏飛龍閑廐馬數千朝飲吳江夕秣燕紅塵
撲轡汗溼韉師子麒麟聊比肩曲江昆明洗刷牽四蹏踏浪頭枿

天蛟龍稽顙河伯虔拓羯胡雛脚手鮮陳閔韓幹丹青妍欲貌未
貌眼欲穿金鞍玉勒錦連乾騎入桃花楊柳煙十二樓中奏管絃
樓中美人奪神仙爭愛大家把此鞭祿山入關關破年忽見揚州
北邸前祇有人還干一錢亭亭筆直無皺節磨將形相一條鐵市
頭格是無人別江海賤臣不拘綈垂鞘掛影西窗缺稚子覓衣挑
仰穴家僮拾薪幾拗折玉潤猶霑玉壘雪碧鮮似染萇弘血蜀帝
祠邊子規咽相如橋上文君絕往來策馬降至尊七盤九折橫劔
門穆王八駿超崑崙安用冉冉孤生根聖人不貴難得貨金玉珊
瑚誰買恩

暑日題道邊樹

王穀

火輪迸燄燒長空浮埃撲面愁濛濛羸僮走馬喘不進忽逢碧樹
含清風清風留我移時住滿地濃陰懶前去卻歎人無及物功不
似團團道邊樹

井上桐

陸龜蒙

美人傷別離汲井常待曉愁因轆轤轉驚起雙棲鳥獨立傍銀牀
碧桐風嫋嫋

石上藤

岑參

石上生孤藤弱蔓依石長不逢高枝引未得凌空上何處堪託身
為君長萬丈

兔絲

元稹

人生莫依倚倚事不成君看兔絲蔓依倚榛與荆荆榛易蒙密
百鳥撩亂鳴下有狐兔穴奔走亦縱橫樵童斫將去柔蔓與之并
翳蒼生可恥束縛死無名桂樹月中出珊瑚石上生俊鶻渡海食
應龍昇天行靈物本特達不復相纏縈纏縈竟何者荆棘與飛莖

春草謠

顧況

春草不解行隨人上東城正月二月色絲絲千里萬里傷人情

王兵馬使二角鷹

杜甫

悲臺蕭颯石寵崕哀壑杈枒浩呼洵中有萬里之長江迴風陷作一

汨曰孤光動角鷹翻倒壯士臂將軍玉帳軒勇氣二鷹猛腦繚徐
墜目如愁胡視天地杉雞竹兔不自惜溪虎野羊俱辟易韞上鋒
稜十二翮將軍勇銳與之敵將軍樹勳起安西崑崙虞泉入馬蹏
白羽曾肉三狡獬敢決豈不與之齊荆南芮公得將軍亦如角鷹
下朔雲惡鳥飛飛啄金屋安得爾輩開其羣驅出六合梟鷲分

觀放白鷹

李白

八月邊風高胡鷹白錦毛孤飛一片雪百里見秋豪

飛鳶操

劉禹錫

鳶飛杳杳青雲裏鳶鳴蕭蕭風四起旗尾飄揚勢漸高箭頭若劃
聲相似長空悠悠霽日懸六翮不動凝飛煙游鷗翔鴈出其下慶
雲清景相迴旋忽聞饑鳥噪相聚瞥下雲中爭腐鼠騰音礪吻相
喧呼仰天大嚇疑鷓鴣畏人避犬投高處俛啄無聲猶屢顧青鳥
自愛玉山禾仙禽徒貴華亭露樸楸危巢向暮時陪鰓飽腹蹲枯
枝遊童挾彈一麾肘臆碎羽分人不悲天生眾禽各有類威鳳文

章在仁義鷹隼儀形螻蟻心雖能戾天何足貴

百舌吟

曉星寥落春雲低初聞百舌間關嗁花枝滿空迷處所搖動繁英
墜紅雨笙篁百嘯音韻多黃鸝吞聲燕無語東方朝日遲遲升迎
風弄景如自矜數聲不盡又飛去何許相逢綠楊路縣蠻宛轉似
娛人一心百舌何紛紜醜顏俠少停歌聽墮珥妖姬和睡聞可憐
光景何時盡誰能低回避鷹隼廷尉張羅自不關潘郎挾彈無情
損天生羽族爾何微舌端萬變乘春暉南方朱鳥一朝見索漠無
言蒿下飛

鸚鵡詞

蘇郁

莫把金籠閉鸚鵡箇箇分明解人語忽然更向君前語三十六宮
愁幾許

鴛鴦篇

陳子昂

飛飛鴛鴦鳥舉翼相蔽虧俱來淥潭裏共向白雲涯音容相眷戀

羽翮兩逶迤蘋萍戲春渚霜霰遶寒池浦沙連岸淨汀樹拂潭垂
年年此遊翫歲歲來追隨鳳凰起丹穴獨向梧桐枝鴻鴈來紫塞
空憶稻梁肥鳥嗁倦依託一作鶴鳴傷別離豈若此雙禽飛翻不
異林刷毛青江浦交頸紫山岑文章負奇色和鳴多好音聞有鴛
鴦綺復有鴛鴦衾持為美人贈勗此故交心

子規啼

韋應物

高林滴露夏夜清南山子規嗁一聲鄰家婦婦抱兒泣我獨展轉
何時明一作何

鴝鵒吟

劉禹錫

朝陽有鳴鳳不聞千萬祀鴝鵒催眾芳畏聞先入耳秋風白露晞
從是爾嗁時如何上春日唧唧滿庭飛

春蟬

元稹

我自東歸日厭苦春鳩聲作詩憐化工不遣春蟬生及來商山道
山深氣不平春秋兩相似虫豸百種鳴風松不成韻蜩蟬沸如羹

豈無朝陽鳳羞與微物爭安得天上雨奔渾河漢傾蕩滌反時氣
然後好晴明

江上蚊子

韋楚老

搖狹翅亞紅腹江邊夜起如雲哭請問貪婪一點心腐肉填腹幾
多足越女如花住江曲寒娥夜夜凝雙綠任君撩亂錦窗中十幅
輕綃圍夜玉

戲題關門

岑參

來亦一布衣去亦一布衣羞見關城吏還從舊路歸

門前路

陸龜蒙

門前向城路一直復一曲曲去日中還直行日暮宿何必日中還
曲塗荆棘間

文粹卷第十七上

文粹卷第十七下

吳興 姚鉉 纂

詩十二 總五十六首

古調歌篇八

月明河

月生句 劉猛

把酒問月 李白

月蝕詩 盧仝

明河篇 宋之問

風雨露雪

賀雨詩 白居易

洛陽清明日雨霽 李正封

詠露

山雪 釋皎然

文粹十七下

秋風引 劉禹錫

竹窗聞風寄苗發司空曙 李益

江海泉水 獨孤及

西陵口觀海 薛據

題玉潭 獨孤及

及第後過揚子江 施肩吾

責漢水詞 李善夷

迎潮送潮詞二首 陸龜蒙

引泉詩

從蕭叔子聽彈琴賦得三峽流泉歌 李冶

明冰篇 富嘉謨

宮禁 王昌齡

殿前曲 王昌齡

西施詠 王維

三閣詞四首 劉禹錫

霓裳羽衣曲 李肱

神仙

遊仙詩十六首 道士吳筠

上元夫人詩 李白

王子喬 宋之問

玉真仙人詞 李白

夢太白西峯 常建

苦篁調笑引 李賀

少室山韋鍊師昇仙歌 皇甫冉

宿青牛谷梁鍊師仙居 楊衡

玄都壇歌寄元逸人 杜甫

寄全椒山中道士 韋應物

洗心 道士司馬退之

齋心 王昌齡

寄菖蒲 張籍

金璫玉佩歌 顧況

月生句

劉猛

月生十五前日望光彩圓月滿十五後日畏光彩瘦不見夜花色一尊成暗酒匣中苔背銅光短不遍空不惜補明月慙無此良工

把酒問月

故人賈淳令余問之

李白

青天有月來幾時我今停盃一問之人攀明月不可得月行卻與人相隨皎如飛鏡臨丹闕綠煙滅盡清輝發但見宵從海上來空知曉向雲間沒白兔搗藥秋復春姮娥孤棲誰與鄰今人不見古時月今月曾經照古人古人今人若流水共看明月皆如此唯願當歌對酒時月光長照金尊裏

月蝕詩

盧仝

新天子即位五年歲次庚寅斗柄插子律調黃鍾森萬木夜疆立寒氣鬣肩頑無風爛銀盤從海底出出來照我草屋東天色紺滑凝不流冰光交貫寒瞳矐初疑白蓮花浮出龍王宮八月十五夜比並不可雙此時怪事發有物吞食來輪中輪如壯士斧斫壤桂似雪山風拉摧百鍊鏡照見膽平地埋寒灰火龍珠飛出腦卻入蚌蛤胎搥環破壁眼看盡當天一搭如煤炘磨蹤滅跡須臾間便似萬古不可開不料至神物有此大狼狽星如撒沙出爭頭事光大奴婢炷鐙看揜烏感焚如玳瑁今夜吐燄如長虹孔隙千道射戶外玉川子涕泗下中庭獨自行念此日月者太陰太陽精皇天要識物日月乃化行走天汲汲勞四體與天作眼行光明此眼不自保天公行道何由行吾見陰陽家有說望日蝕月光滅朔月掩日日光缺兩眼不相攻此說吾不容又孔子師老子云五色令人目盲吾恐天似人好色則喪明幸且非春時萬物不嬌榮青山破瓦色淥水冰崢嶸花枯無女豔鳥死沈歌聲頑冬何所好偏

使一目盲又聞古老說蝕月蝦蟇精徑圓千里八汝腹如此癡駭
阿誰生可從海窟來便解緣清冥恐是睚眦間措塞所化成黃帝
有二目帝舜重瞳明二帝懸四目四海生光輝吾不遇二帝滉泮
不可知何故瞳子上坐使蟲豸欺長嗟白兔搗靈藥恰似有意防
姦非藥成滿日不中度委任白兔夫何為憶昔堯為天十日燒九
州金爍水銀流玉熠丹砂焦六合烘為窯堯心增百憂天見堯心
憂勃然發怒決洪流立擬沃殺九日妖天高日走沃不及但見萬
國赤子戢戢生魚頭此時九御導九日爭持節幡麾幢旒駕車六
九五十四頭蛟螭蚪掣電九火轉汝若蝕開齟齬輪御轡執索相
爬鉤推蕩轟訇入汝喉紅鱗燄鳥燒口快翎鬣倒側聲醜鄒撐腸
拄肚礪礪如山邱自可飽死不偷不獨填飢坑亦解堯心憂恨
汝時當食埋頭獸腦不肯食不當食張脣哆齧食不休食天之眼
養逆命安得上帝請汝劉嗚呼人養虎被虎齧天媚蠹被蠹瞎乃
知恩非類一一自作孽吾見患眼人必索良工訣想天不異人愛

眼固應一安得嫦娥氏來習扁鵲術手操春喉戈去此睛上物初
既猶朦朧既久如抹漆但恐功業成便此不吐出玉川子又涕泗
下心禱再拜額揚沙土中地上蟻蝨臣全告訴帝天皇臣心有鐵
一寸可剗妖蠹癘腸皇天不為臣立梯磴臣血肉身無由飛上天
揚天光封詞付與小心風威排闥闖入紫宮密邇玉几前擘拆奏
上臣全頑愚冒敢死橫干天甚長東方蒼龍角插戟尾掉風當心
開明堂統領三百六十鱗蟲坐治東方宮月蝕不救援安用東方
龍南方火鳥赤潑血項長尾短飛跋刺頭戴井冠高遠枿月蝕鳥
宮十二度鳥為居停主人不覺察貪向何人家行赤口毒舌毒蟲
頭上喫卻月不啄殺虛眨鬼眼赤突窟窳鳥罪不可雪西方攫虎
立倚倚暗斧為牙鑿為齒偷犧牲食封豕大蠹一嚙固當軟美見
似不見是何道理爪牙根天不念天天若準擬錯準擬北方寒龜
被蛇縛藏頭入殼如入獄蛇筋束緊束破殼寒龜夏鼈一種味且
當臙其肉一底板沒信處唯堪支牀腳不中鑽灼與天下卜歲星

主福德官爵奉董秦忍使黔婁生覆尸無衣巾天失眼不弔歲星
胡其仁熒惑矍鑠公執法大中月明無罪過不糾蝕月蟲年年
十月朝太微支盧謫罰何災凶土星與土性相背反養福德生禍
害到人頭上死破敗今夜月蝕安可會太白真將軍怒激鋒銳生
恆州陣斬鄴定進項骨脆甚春蔓菁天唯兩眼失一眼將軍何處
行天兵辰星任廷尉天津自主持人命在盆底固應樂見天盲時
天若不肯信試喚皋陶鬼一問而今三台文章宮作上天紀綱環
天二十八宿磊落尚書郎整頓排班行劍握他人將一四太陽側
一四天市旁操斧代大匠兩手不怕傷弧矢引滿反射人天狼呀
啄明煌煌癡牛與駭女不肯勤農桑徒勞含淫思且夕遙相望蚩
尤簸旗弄旬朔始搥天鼓鳴瑤琅枉矢龍蛇行眉目森森張天狗
下舐地血流何滂滂譎險萬萬黨構架何可當眯目釁成就害我
光明王請留北斗一星相北極指揮萬國懸中央此外盡拂除沙
磧如山岡贖我父母光當時恆星沒隕雨如抨漿似天會事發叱

喝誅姦狂何故中道廢自遺今日殃善善又惡惡郭公所以亡願
天神聖心無信他人忠玉川子詞訖風色緊格格近月墨暗邊有
似動劔戟須臾癡臺精兩吻自決坵初露半个壁漸吐滿輪魄眾
星盡原赦一臺獨誅磔腹肚忽脫落依舊挂穹碧光彩未蘇來慘
淡一片白奈何萬里光受此吞吐厄再得見天眼感荷天地力或
問玉川子孔子修春秋二百四十年月蝕盡不收今子咄咄詞頗
合孔意不玉川子笑答或請聽逗留孔子父母魯諱魯不諱周書
外書大惡故月蝕不見收余命唐天口食唐土唐禮過三唐樂過
五小猶不說大不可數災沴無有小大瘡安引哀周研覈可否日
分晝月分夜辨寒暑一主刑一主德政乃舉孰爲人面上一目偏
可去願天完兩日照下萬方土更不瞽萬萬古更不瞽照萬古

明河篇

宋之問

八月涼風天氣晶萬里無雲河漢明昏見南樓清且淺曉落西山
縱復橫洛陽城闕天中起長河夜夜千門裏復道連臺共蔽虧畫

堂瓊戶特相宜雲母帳前初汎濫水精簾外轉逶迤倬彼昭回如
練白復出東城接南陌南陌征人去不歸誰家今夜擣寒衣鴛鴦
機上疏螢度烏鵲橋邊一鴈飛鴈飛螢度愁難歇坐見明河漸微
沒已能舒卷任浮雲不惜光輝讓流月明河可望不可親願得乘
槎一問津更將織女支機石還訪成都賣卜人

賀雨詩

白居易

皇帝嗣寶曆元和三年冬自冬及春暮不雨旱熯熯上心念下民
懼歲成災凶遂下罪己詔殷勤告萬邦帝曰予一人繼天承祖宗
憂勤不遑寧夙夜心忉忉元年誅劉闢一舉靖巴邛二年戮李錡
不戰安江東顧惟眇眇德遽有巍巍功或者天降沴無乃儆予躬
上思答天戒下思致時邕莫如率其身慈和與儉恭乃命罷進獻
乃命賑飢窮宥死降五刑已責寬三農宮女出宣徽廐馬減飛龍
庶政靡不舉皆出自宸衷奔騰道路人傴僂田野翁懽呼相告報
感泣涕霑胷順人人心悅先天天意從詔下纔七日和氣生沖融

疑爲油油雲散作習習風晝夜三日雨淒淒復濛濛萬心春熙熙
百穀青芄芄人變愁爲喜歲易儉爲豐乃知王者心憂樂與眾同
皇天及后土所感無不通冠佩何鏘鏘將相及王公蹈舞呼萬歲
列賀明庭中小臣誠愚陋職忝金鑾宮稽首再三拜一言獻天聰
君以明爲聖臣以直爲忠敢賀有其始亦願有其終

洛陽清明日雨霽

李正封

曉日清明天夜來嵩少雨千門尚煙火九陌無塵土酒綠河橋春
漏閒宮殿午遊人戀芳草半犯嚴城鼓

詠露

霏霏靈液重雲表無聲落霑樹急立蟬灑池淒皓鶴流塵清遠陌
飛月澄高閣宵潤玉堂簾曙寒金井索佳人比珠淚坐感紅綃薄

山雪

釋皎然

夕陽在西峯疊翠縈殘雪狂風卷絮迴驚猿攀玉折何意山中人
誤報山花發

秋風引

何處秋風至蕭蕭送鴈羣今朝入庭樹孤客最先聞

劉禹錫

竹窗聞風寄苗發司空曙

李益

微風驚暮坐臨牖思悠哉開門復動竹疑是故人來時滴枝上露稍霑階下苔幸當一入幌為拂綠琴埃

觀海

獨孤及

北登渤海島迴首秦東門誰尸造物功鑿此天池源瀕洞吞百谷周流無四垠廓然混茫際望見天地根白日自中吐扶桑如可捫迢遙蓬萊峯想像金臺存秦帝昔經此登臨異飛翻揚旌百神會望日羣山奔徐福竟何成羨門徒空言唯見石橋足千年潮水痕

西陵口觀海

薛據

浙江漫湯湯近海勢彌廣在昔胚渾凝融為百川決地形失端倪天色潛滉瀆東南際萬里極目遠無象山影乍浮沉潮波忽來往孤帆或不見權歌猶想像日暮長風起客心空振蕩浦口霞未收

潭心月初上林嶼幾迴迴亭皋時偃仰歲晏訪蓬瀛真遊非外獎

題玉潭

獨孤及

碧玉徒強名冰壺難比德唯當寂照心可並瀟淪色

及第後過揚子江

施肩吾

憶昔將貢年抱愁此江邊魚龍互閃鑠黑浪高於天今日步春草復來經此道江神也世情為我風色好

責漢水辭并序

李善夷

春秋僖公四年齊桓公合諸侯之師盟于召陵責楚之苞茅不入問昭王南征而不復楚子使屈完對曰貢之不入寡君之罪也敢不供給昭王南征之不復君其問諸水濱按照昭王南征至漢舟人膠其舟王遂溺死杜預曰當時漢水未屬楚杜之注其為謬哉且楚實殷之始封楚苦縣瀨鄉在漢水東北六百餘里則漢水於西周之際豈未屬楚乎又詩云撻彼殷武奮伐荆楚架入其阻裒荆之旅鄭玄注云深入方城之阻也方城今在漢水北三百里豈昭

王時未屬楚乎屈完以齊桓所問之大不敢他對但請自問於水濱之人言我不之知也漢實屬楚久矣夫山林川澤天子祀之必有其人楚人膠其船而禍其君神不能福神之罪也余過漢見其波濤混養而責其水詞曰
漢之廣兮風波四起雖有風波不如蹠涔之水蹠涔之水不為下國而傾天子漢之深兮其隄莫量雖云莫量不如行潦之汪行潦之汪不為下國而溺天王漢之美者曰魴吾雖飢不食其魴恐汚吾之飢腸

迎潮送潮詞二首并序

陸龜蒙

余耕稼所在松江南旁田廬門外有溝通浦澗而朝夕之潮至焉天弗雨則輒而留之用以滌濯灌溉及物之功甚鉅其羸壯遲速繫望晦盈虛也用之則順而進捨之則默以退有類乎君子之道翫而感之作迎潮送潮詞二首聊寄聲於騷人之末
江霜嚴兮楓葉丹潮聲高兮墟落寒鷗巢卑兮漁箔短遠岸沒兮

光爛爛潮之德兮無際既充其大兮又充其細密幽人兮款柴門寂寞流連兮依稀舊痕濡餘澤槁兮潮之恩不尸其功兮歸于混元

右迎潮

湖西來兮又東下日染中流兮紅灑灑汀葭蒼兮水蓼枯風騷牢兮愁烟孤大幾望兮微將翳晦搜瀛溶兮斂然而退愛長波兮數數一幅巾兮無纓可濯帆生塵兮權有衣悵潮之還兮吾猶未歸

右送潮

引泉詩陸州龍興觀老君院作

上嗣位六載吾宗刺桐川余來拜旌戟詔下之明年是時春三月繞郭花蟬聯嵐盤百萬髻上插黃金鈿授以道士館置榻于東偏滿院聲碧樹空堂形老仙本性樂凝淡及來更虛玄焚香禮真像盥手披靈編新安山角角烏龍獨巉然烏龍除非淨晴日不見蒼崖巔上有擎雲峯下有噴壑泉泉分數十派落處皆崢嶸寒聲入

爛醉聒破西窗眠支筇起獨尋祇在牆東邊呼僮具畚鍤立鑿莓
苔穿叢澗一派墮練帶橫斜牽亂石拋落落寒流響濺濺狂怒七
里瀨縮到疏楹前跳光潑半散湧沫飛旋圓勢東三峽挂瀉危孤
磴懸曾聞瑤池溜亦灌朱草田覺伯弄翠鸞鸞舞舞丹煙凌風振
桂棹隔霧馳犀船況當玄元家嘗著道德篇上善可比水斯文參
五千精靈若在此肯惡微波傳不擬爭滴瀝還應會淪漣出門後
飛箭合勢浮青天必有學真子鹿冠秋鶴顏如能輔余志日使疏
其源

從蕭叔子聽彈琴賦得三峽流泉歌 李冶

妾家本住巫山雲巫山流泉常自聞玉琴彈出轉寥夔直似當時
夢裏聽三峽迢迢幾千里一時流入幽閨裏巨石崩崖指下生飛
波走浪弦中起初疑憤怒含雷風復似嗚咽流不通迴湍曲瀨意
將盡時復滴瀝平沙中憶昔阮公爲此曲能令仲容聽不足一彈
既畢還一彈願作流泉鎮相續

明冰篇

富嘉謨

北陸蒼茫河海凝南山闌干晝夜冰素彩峩峩明月升深山窮谷
不自見安知採斲備嘉薦陰房固沍掩寒扇陽春二月朝始噉春
光潭沲度千門明冰時出御至尊彤庭赫赫九儀備腰玉煌煌干
官事明冰畢歲周在位憶昔沙朔寒風漲崑崙長河冰始壯漫汗
陵嶒積亭障邕邕鳴鴈江上來禁苑池臺冰復開搖春涵綠映樓
臺幽歌七月王風始明冰藏用昭物軌四時不忒千萬祀

殿前曲

王昌齡

貴人妝梳殿前催香風吹入殿後來仗引笙歌大宛馬白蓮花發
照池臺

西施詠

王維

豔色天下重西施寧久微朝爲越溪女暮作吳宮妃賤日豈殊眾
貴來方悟稀邀人傅香粉不自著羅衣君寵益嬌態君憐無是非
當時浣紗伴莫得同車歸寄謝鄰家子效顰安可希

三閣詞

吳音四首

劉禹錫

貴人三閣上日晏未梳頭不應有恨事嬌甚卻成愁
珠箔曲瓊鉤子細見揚州北兵那得渡浪語聲悠悠
沈香帖閣柱金縷畫門楣迴首降幡下已見黍離離
三人出簪井一身登檻車朱門謾臨水不得見鱸魚

霓裳羽衣曲

李肱

開元太平日萬國賀豐歲梨園厭舊曲玉座流新製鳳管遞參差
霞衣競搖曳宴罷水殿空輦餘春草細蓬壺事已久仙樂功無替
詎肯聽遺音聖明知善繼

遊仙十六首

道士吳筠

啟冊觀往載搖懷考今情終古已寂寂舉世何營營悟彼眾仙妙
超然含至精凝神契沖玄化服凌太清心同宇宙廣體合雲霞輕
翔風吹羽蓋慶霄拂霓旌龍駕朝紫微後天保令名豈如寰中士
軒冕矜薶榮

鸞鳳棲瑤林鵬鸚集平楚飲啄本殊好翱翔終異所吾方遺諠囂
立節慕高舉解茲區中戀結彼霄外侶誰謂天路遙感通自無阻
愍俗從遷謝尋仙去淪沒三元有真人與我生道骨凌晨吸丹景
入夜飲黃月百關彌調暢方寸益清越棲神合虛無洞覽周恍惚
不覺隨玉皇焚香詣金闕

西龜初定錄東華已校名三官無遺譴七祖昇雲輶體妙塵累隔
心微玄化并一朝出天地億載猶童嬰使我齊浩劫蕭蕭宴玉清
怡神在靈府皎皎含清澄仙經不吾欺輕舉信有徵疇昔希道念
而今果天矜豈非陰功著乃致白日昇焉用過洞府吾其越朱陵
高真誠寥邈道合不我遺孰謂姑射遠神人可同嬉結駕從之遊
飄飄出天垂不理人自化神凝物無疵因知至精感足以和四時
入海廣無際三山高不極金臺羅中天羽客恣遊息霞液朝可飲
虹芝晚堪食嘯歌自忘心騰舉寧假翼保壽同三光安能紀千億
將過太帝宮躋詣扶桑處真童已相迓爲我清宿霧海若寧洪濤

羲和止奔馭五雲結層閣八景動飛輿青霞正可挹丹楹時一遇
留我宴玉堂歸軒不令遽

欲趨洞陽界試覽丹極表赤帝躍火龍炎官控朱鳥導我昇絳府
長驅出天杪陽靈赫重暉四達何皎皎爲爾流飄風羣生遂無天
予因詣金母飛蓋超西極遂入素中天停輪太濛側若華拂流影
不使白日匿傾曦復亭午六合無暝色道化隨感遷此理誰能測
九龍何蜿蜒載我昇雲綱臨睨懷舊國風塵混蒼茫依依遠人寰
去去邇帝鄉上超星辰紀下視日月光倏已過太微天居煥煌煌
停驂太儀側整服金闕前肅肅承上帝鏘鏘會羣仙鳴鑪發靈香
廣廡張鈞天玉醴洽中座霞膏充四筵良期無終極俛仰移億年
峻朗妙門闢澄微真鑒通瓊林九霞上金閣三天中飛蚪躍慶雲
翔鶴搏靈風鬱彼玉京會仙期六合同
子昇至陽源欲憩明霞館飄飄瓊輪舉眊眊金景散結虛成萬有
高妙咸可翫玉山鬱嵯峨琅海杳無岸躡賞過千椿遐齡誰復筭

招攜紫陽友合宴玉清臺排景羽衣振浮空雲駕來靈旛七曜動
瓊障九光開鳳舞龍璫奏蚪軒殊未迴

高昇紫極上宴此立都岑玉藥散奇香瓊柯流雅音靈風生太漠
習習吹人襟體混希微廣神凝空洞深蕭然宇宙外自得乾坤心

上元夫人詩

李白

上元誰夫人偏得王母嬌嵯峨三角髻餘髮散垂腰裘披青色錦
身著赤霜袍手提羸女兒閒與鳳吹簫眉語兩自笑忽然隨風飄

王子喬

宋之問

王子喬愛神仙七月七日上賓天白虎搖瑟鳳吹笙乘騎雲氣喻
日精喻日精長不歸遺廟今在而人非空望山頭草草露溼君衣

玉真仙人詞

李白

玉真之真人時往太華峯清晨鳴天鼓颺歛騰雙龍弄霓不輟手
行雲本無蹤幾時入少廣王母應相逢

夢太白西峯

常建

夢寐昇九崖杳靄逢元君攜我太白峯寥寥辭垢氛結宇在星漢
冥林閉氤氳蒼楹覆餘翠巾鳥生片雲時往溪谷間孤亭晝仍曛
松風引天影石瀨清霞文恬目緩舟趣霽心投鳥羣春風又搖櫂
潭島花紛紛

苦篁調笑引

李賀

請說軒轅在時事伶倫采竹二十四伶倫采之自崑邱軒轅以之
調元氣當時黃帝上天時二十三管咸相隨唯留一管人間吹無
德不能得此管此管沈埋虞舜祠

少室山韋鍊師昇仙歌

皇甫冉

紅霞紫氣甚氤氳絳節青童迎少君忽從林下昇天去空使時人
禮白雲

宿青牛谷梁鍊師仙居

楊衡

隨雲步八青牛谷青牛道士留我宿可憐夜久月明中唯有壇邊
一枝竹

玄都壇歌寄元逸人

杜甫

故人昔隱東蒙峯已佩含景蒼精龍故人今居子午谷獨傍陰崖
結茅屋屋前太古玄都壇青石漠漠常風寒子規夜啼山竹裂王
母晝下雲旗翻知君此計成長往芝草琅玕日應長鐵鎖高垂不
可攀致身福地何蕭爽

寄全椒山中道士

韋應物

今朝郡齋冷忽念山中客澗底束荆薪歸來煮白石欲持一瓢酒
遠慰風雨夕落葉滿空山何處尋行跡

洗心

道士司馬退之

不踐名利道始覺塵土腥不味稻粱食始覺神骨清羅浮奔走外
日月無短明山瘦松亦勁鶴老飛更輕逍遙此中客翠髮皆長生
草木多古色雞犬無新聲君有出俗志不貪英雄名傲然脫冠帶
改換人間情去矣丹霄路向曉雲冥冥

齋心

王昌齡

女蘿覆石壁溪水幽濛朧紫葛蔓黃花娟娟寒露中朝飲花上露

松林

夜臥松下風雲英化為水光彩與我同日月蕩精魄寥寥天宇空

寄菖蒲

張籍

石上生菖蒲一寸十二節仙人勸我食令我頭青面如雪逢人寄

君一絳囊書中不得傳此方君能來作棲霞侶與君同入丹玄鄉

顧況

贈君金璫太霄之玉佩金鎖禹步之流珠五嶽真君之祕錄九天
丈人之寶書東井沐浴辰已畢先進洞房上奔日借問君從何處
來黃姑織女機邊出

文粹卷第十七下

文粹卷第十八

吳興 姚鉉 纂

詩十三 總一百三十六首

古調歌篇九

感寓

感寓詩三十八首 陳子昂

感寓七首 張九齡

感寓 權德輿

效陳拾遺子昂感寓二首 司空圖

古意二首 孫邨

詠史

詠史十一首 李華

詠史 高適

詠史二首 釋皎然

文粹十八

詠史二首 劉禹錫

詠史四首 盧照鄰

讀李斯傳 曹鄴

慨嘆

出關作 魏徵

隴右途中遭非語 員半千

書懷 劉幽求

自紀 皇甫松

贈友人 呂溫

贈韓愈二首 孟郊

贈喬林 劉沓虛

寄唐生 白居易

華下 司空圖

傷時二首 孟雲卿

封邱作 高適

街西居三首 姚合

效陳拾遺子昂 司空圖

感時

夜坐 張說

無可奈何歌 白居易

逢白公 元稹

感懷 費冠卿

贈崔純亮 孟郊

客喜 賈島

有所思 宋之問

秦人謠 古之奇

時興 楊賁

聞砧有感 呂溫

野田行于鵠

贈馮宿李觀

偶然作二首呂溫

及第後答潼關主人

朝飢賈島

九日酬顏少府高適

感物

觀玉篇陳子昂

素絲陸龜蒙

李都尉古劍白居易

廢琴

廢瑟詞張籍

說劍元稹

春桂問答二首王績

養鷺詞劉禹錫

對菊賈島

直鉤吟盧仝

競渡元稹

冬日見牧牛人擔青草歸張說

道州觀野火呂溫

諭寶二首元稹

春感

送春曲三首劉禹錫

衡州早春二首呂溫

尋人偶題邵真

題花樹楊衡

惜花陸龜蒙

秋感

秋日 張緯

秋夕懷遠 孟郊

蟋蟀詩 羅隱

秋思 司空圖

在郡秋懷二首 張九齡

感寓詩三十八首

陳子昂

微月生西海幽陽始化昇圓光正東滿陰魄已朝凝太極生天地
 三元更廢興至精諒斯在三五誰能徵
 蘭若生春夏芊蔚何青青幽獨空林色朱黠冒紫莖遲遲白日晚
 嫋嫋秋風生歲華盡搖落芳意竟何成
 蒼蒼丁零塞今古緬荒途亭埃何摧兀暴骨無全軀黃沙漠南起
 白日隱西隅漢甲三十萬曾以事匈奴但見沙場死誰憐塞上孤
 樂羊為魏將食子殉軍功骨肉且相薄他人安得忠吾聞中山相
 乃屬放麋翁孤獸猶不忍況以奉君終

市人矜巧智於道若童蒙傾奪相夸侈不知身所終曷見玄真子
 觀世玉壺中杳然遺天地乘化入無窮

吾觀龍變化乃知至陽精石林何冥密幽洞無畱行古之得仙道
 信與元化并玄感非象識誰能測淪冥世人拘目見酣酒笑丹經
 崑崙有瑤樹安得采其英

白日每不歸青陽時暮矣茫茫吾何思林卧觀無始眾芳委時晦
 鷓鴣鳴悲耳鴻荒古已積誰識巢居子

吾觀崑崙化日月淪洞冥精魄相交構天壤以羅生仲尼推太極
 老聃貴窈冥西方金仙子崇議乃無明空色皆寂滅業緣定何成
 名教信紛籍死生俱未停

聖人祕元命懼世亂其真如何嵩公輩詆譎誤時人先天誠為美
 階亂禍誰因長城備胡寇羸禍發其親赤精既迷漢子年何救秦
 去去桃李花多言死如麻
 深居觀元化悱然爭朵頤讒說相啖食利害紛疑礙便便夸毘子

榮耀更相持務光讓天下商賈競刀錐已矣行采芝萬世同一時
吾愛鬼谷子青谿無垢氛囊括經世道遺身在白雲七雄方龍鬪
天下久無君浮榮不足貴遵養晦時文舒可彌宇宙卷之不盈分

豈徒山木壽空與麋鹿羣

呦呦南山鹿離苦以媒和招搖青桂樹幽蠹亦成科世情甘近習
榮耀紛如何怨憎未相復親愛生禍羅瑤臺傾巧笑玉杯殞雙蛾
誰見枯城檠青青成斧柯

林居病時久水木澹孤清閒卧觀物化悠然念無生青春始萌達
朱火已滿盈徂落方自此感歎何時平

臨岐泣世道天命良悠悠昔日殷王子玉馬遂朝周寶鼎淪伊穀
瑤臺成古邱西山傷遺老東陵有故侯

貴人難得意賞愛在須臾莫以心如玉探他明月珠昔稱天桃子
今爲春市徒鴟鴞悲東國麋鹿泣姑蘇誰見鴟夷子扁舟去五湖
聖人去已久公道緬良難蚩蚩夸毘子堯禹以爲謾驕榮貴工巧

勢利遞相干燕王尊樂毅分國願同歡魯連讓齊爵遺組去邯鄲
伊人信往矣感激爲誰歎

幽居觀天運悠悠念羣生終古代興沒豪聖莫能爭三季淪周赧
七雄滅秦嬴復聞赤精子提劍入咸京炎光旣無象晉虜復縱橫
堯禹道已昧昏虐勢方行豈無當世雄天道與胡兵咄咄安可言
時醉而未醒仲尼溺東魯伯陽遁西溟天運自古來旅人胡歎哉
逶迤世已久骨鯁道斯窮豈無感激者時俗積此風灌園何其鄙
皎皎於陵子世道不相容嗟張長公

聖人不利己憂濟在元元黃屋非堯意瑤臺安可論吾聞西方化
清淨道彌敦奈何窮金玉彫刻以爲尊雲構山林盡瑤圖珠翠煩
鬼功尙未可人力安能存夸愚適增累矜智道逾昏

玄天幽且默羣議曷嗤嗤聖人教猶在世運久陵遲一繩將何繫
憂醉不能持去去行采芝勿爲塵所欺

蜻蛉遊天地與世本無患飛飛未能止黃雀來相干穰侯富秦寵

金石比交歡出入咸陽裏諸侯莫敢言寧知山東客激怒秦王肝

布衣取丞相千載爲辛酸

微霜知歲晏斧柯始青青況乃金天夕浩露霑羣英登山望宇宙

白日已西暝雲海方蕩潏孤鱗安得寧

翡翠巢南海雄雌珠樹林何知美人意嬌愛比黃金殺身炎洲裏
委羽玉堂陰旖旎光首飾歲蕤爛錦衾豈不在遐遠虞羅忽見尋

多材信爲累歎息此珍禽

挈瓶者誰子姣服當青春三五明月滿盈盈不自珍高堂委金玉

微縷懸千鈞如何負公鼎彼奪笑時人

玄蟬號白露茲歲已蹉跎羣物從大化孤英將奈何瑤臺有青鳥

遠食玉山禾崑崙見玄鳳豈復虞雲羅

荒哉穆天子好與白雲期宮女多怨曠層城閉蛾眉日耽瑤池樂

豈傷桃李時青苔空萎絕白髮生羅帷

朝發宜都渚浩然思故鄉故鄉不可見路隔巫山陽巫山彩雲沒

高邱正微茫佇立望已久涕淚霑衣裳豈茲越鄉感憶昔楚襄王
朝雲無處所荆國亦淪亡

昔日章華宴荆王樂荒淫霓旌翠羽蓋射兕雲夢林竭來高唐觀
悵望陽雲岑雄圖今何在黃雀空哀吟

丁亥歲云暮西山事甲兵簾糧市叩道荷戟爭羌城嚴合陰風勁
窮岫油雲生昏黷無晝夜羽檄復相驚攀踞萬仞崩危遠九冥
藉藉峰壑裏哀哀冰雪行聖人御宇宙聞道太階平肉食謀何失
葵霍緬縱橫

可惜瑤臺樹灼灼佳人姿碧華映朱實攀折青春時豈不盛光寵
榮君白玉墀但恨紅芳歇凋傷感所思

竭來豪遊子勢利禍之門如何蘭膏歎感激自生冤眾趨明所避
時棄道猶存雲泉旣已失羅網與誰論箕山有高節湘水有清源
唯應白鷗鳥可爲洗心言

索居獨幾日炎夏忽然衰陽彩皆陰翳親友盡睽違登山望不見

涕泣久漣洏宿夢感顏色若與白雲期世閒驕豪子驅逐正嗤嗤
蜀山與楚水攜手在何時

金鼎合神丹世人將見欺飛飛騎羊子胡乃在蛾眉變化固幽類
芳菲能幾時疲痾苦淪世憂瘴日侵淄眷然顧幽褐白雲空涕洟
朔風吹海樹蕭條邊已秋亭上誰家子哀哀明月樓自言幽燕客
結髮事遠遊赤丸殺公吏白刃報私讎避仇至海上被役此邊州
故鄉三千里遼水復悠悠每憤胡兵入常為漢國羞何知七十戰
白首未封侯

本為貴公子平生實愛才感時思報國拔劍起蒿萊西馳丁令塞
北上單于臺登山見千里懷古心悠悠誰言未忘禍磨滅成塵埃
浩然坐何暮吾蜀有蛾眉念與楚狂子悠悠白雲期時哉悲不會
涕泣久漣洏夢登綬山穴南采巫江芝探元觀奇化遺世從雲螭
婉變將末矣感悟不見之

朝入雲中郡北望單于臺胡秦何密邇沙朔氣雄哉藉藉天驕子

猖狂已復來塞垣無名將亭堠空崔嵬咄嗟吾何歎邊人塗草萊
仲尼探元化幽鴻順陽和大運自盈縮春秋遞來過盲聽忽號怒
萬物相紛劇溟海皆震蕩孤鳳其如何

感寓七首

張九齡

蘭葉春葳蕤桂華秋皎絜欣欣此生意自爾為佳節誰知林棲者
聞風坐相悅草木本無心何求美人折
幽林歸獨卧滯慮洗孤清持此謝高鳥因之傳遠情日夕懷空意
人誰感至精飛沈理自隔何所慰吾誠
魚遊樂深池鳥棲欲高枝嗟爾蜉蝣羽薨薨亦何為有生豈不化
所感奚若斯神理日微滅吾心安得知浩歎楊朱子徒然泣路歧
孤鴻海上來池潢不敢顧側見雙翠鳥巢在三珠樹矯矯珍木巔
得無金丸懼美服患人指高明逼神惡今我遊冥冥弋者何所慕
吳越數千里夢寐今夕見形骸非我親衾枕即鄉縣化蝶猶不識
川魚安可羨海上有仙山歸期覺神變

抱影吟中夜誰聞此歎息美人適異方庭樹含幽色白雲愁不見

文萃一

卷一

八

滄海飛無翼鳳凰一朝來竹花斯可食
漢上有游女求思安可得袖中一札書欲寄雙飛翼冥冥獨不見
耿耿徒緘憶紫蘭秀空蹊皓露奪幽色馨香歲欲晚感歎情何極
白雲在南山日暮長太息

感寓

權德輿

殘雨倦欹枕病中時序分寒蟲與秋葉一夜隔窗聞虛室對搖落
晤言無與羣冥心試觀化世故如絲棼但看鳶戾天豈見山出雲
下俚徒擊節朱弦祕南薰梧桐秀朝陽上有威鳳文終待九成奏
來儀瑞吾君

效陳拾遺子昂感寓二首

司空圖

高燕飛何捷啄害咨羣鷁人豈玩其暴華軒容爾居強欺自天稟
剛吐信吾徒乃知不平者矯世道終孤
陽和含煦潤卉木競紛華當為眾所悅私已汝何誇北里祕穠豔

東園鎖名花豪奪乃常理笑君徒咄嗟

古意二首

擬梓州陳拾遺

孫邨

屈子生楚國七雄知其材介絜世不容跡合藏蒿萊道廢固命也
瓢飲亦賢哉何事葬江魚空使後人哀
魏禮段干木秦王乃止戈小國有其人大國奈之何賢哲信為美
兵甲豈云多君子戰必勝斯言聞孟軻

詠史十一首

李華

日照崑崙上羽人披羽衣乘龍駕雲霧欲往心無違此山在西北
乃是神仙國靈氣皆自然求之不可得何為漢武帝精意徧羣山
糜費巨萬計宮車終不還蒼蒼茂陵樹足以戒人間
天生忠與義本以佐雍熙何意李司隸而當昏亂時古墳襄城野
斜徑橫秋陂況不禁樵采茅莎無子遺高標尙可仰精爽今何之
一忤中常侍銜寃誰見知常觀黨錮傳撫卷不勝悲
文侯耽鄭衛一聽一忘飧白雪燕姬舞朱弦趙女彈淫聲流不返

文萃一

卷一

池元

惛蕩日無端獻歲受朝時鳴鐘醮百官兩牀陳管磬九奏殊未闌
對此唯恐卧更能整衣冠
漢皇脩雅樂乘輿臨太學三老與五更天王親割牲一人調風俗
萬國和且平單于驟款塞武庫欲銷兵文物此朝盛君臣何穆清
至今墮壇下如有簫韶聲
蜀主相諸葛功高名亦尊驅馳十萬眾怒目瞰中原曹伯任公孫
國忘身不存社宮久蕪沒白雁猶飛翻勿言君臣合可以濟黎元
爲蜀諒不易如曹難復論
秦滅漢帝興南山有遺老危冠揖萬乘幸得厭征討當君逐鹿時
臣等已枯槁寧知市朝變但覺林泉好高卧三十年相看成四皓
帝言翁甚善見顧何不早咸稱太子仁重義亦尊道側聞驪姬事
申生不自保慙出商山雲謁來趨灑埽東宮成羽翼楚舞傷懷抱
後代無其人戾園滿秋草
六國韓最弱末年尤畏秦鄭生爲韓計且欲疲秦人利物可分社

原情堪滅身咸陽古城下萬頃稻苗新
昂藏獬豸獸出自太平年亂代乃潛伏縱人爲禍愆常聞斷馬劍
每壯朱雲賢身死名不滅寒風吹墓田精靈如有在幽憤滿松煙
沂水春可涉泮宮映楊葉麗色異人間珊珊搖佩環展禽恆獨處
深巷生禾黍城上飛海雲城中暗春雨適來鳴佩者復是誰家女
泥沾珠綴履雨溼翠毛簪電影閉蓮臉雷聲飛蕙心自言沂水曲
采蘋兼采菜歸逕雖可尋天陰光景促憐君貞且獨願許君家宿
徒勞惜衾枕子不顧雙蛾豔質誠可重淫風如禮何周王惑褒姒
城闕成陂陁
巢許在嵩穎陶唐不得臣九州上洗耳一命安能親縣邈數千祀
邱中誰隱淪朝遊公卿府夕是山林人蒲帛揚仄陋薜蘿爲搢紳
九重念入夢三事思降神且設庭中燎寧窺泉下鱗
漢時征百越楊僕將樓船幕府功未立江湖已騷然島夷非敢亂
政暴地仍偏得罪因懷壁防身輒控弦三軍求裂土萬里詎聞天

魏關心猶在旗門首已懸如何得良吏一為制方圓

詠史

高適

尚有綈袍贈應憐范叔寒不知天下士猶作布衣看

詠史二首

釋皎然

田氏門下客馮公眾中賤一朝市義還百代名獨擅始知下客不

可輕能使主人功業成借問高車與珠履何如庇賤一書生

獨負高世姿冥冥寄浮俗卜子去不歸何人識荆玉鬻春意不淺

污跡身豈辱鸞鍛樂迤邐蚪蟠甘窘束五噫謫且正可以見心曲

詠史二首

劉禹錫

驃騎非無勢少卿終不去世道劇積波我心如砥柱

賈生明王道衛綰工車戲同遇漢文時何人居貴位

詠史四首

盧照鄰

昔有平陵男姓朱名阿游直髮上衝冠壯氣橫三秋願得斬馬劍

先斷佞臣頭天子玉檻折將軍丹血流捐生不肯拜視死其若休

歸來教鄉里童蒙遠相求弟子數百人散在十二州三公不敢吏

五鹿何能訓名與日月懸義與天壤儔何必疲執戟區區在封侯

偉哉曠達士知命固不憂

季生昔未達身辱功不成髡鉗為臺隸灌園變姓名幸逢滕將軍

兼遇曹邱生漢祖廣招納一朝拜公卿百金孰云重一諾良匪輕

廷議斬樊噲羣公寂無聲處身孤且直遭時坦而平丈夫當如此

唯唯何足榮

大漢昔云季小人道遂振玉帛委闡尹斧鑕嬰摺紳邈哉郭先生

卷舒得其真雍容謝朝廷談笑獎人倫在晦不絕俗處亂不為親

諸侯不得友天子不得臣冲情甄墮甑重價折角巾悠悠天下士

相送洛橋津誰知仙舟上寂寂無四鄰

公業負奇志交結盡才雄良田四百頃所食常不充一為侍御史

慷慨說何公何公何為敗吾謀適不同仲穎恣殘忍廢誠良在躬

死人如亂麻天子如轉蓬干戈及黃屋荆棘生紫宮鄭生運其謀

將以清國戎時來命不遂脫身歸山東凜凜千載下穆然懷清風

讀李斯傳

曹鄴

欺暗常不然欺明當自戮難將一人手掩得天下目

出關作

魏徵

中原還逐鹿投筆事戎軒縱橫計不就慷慨志猶存策杖謁天子
驅馬出關門請纓繫南越憑軾下東藩鬱紆陟高岫出沒望平原
古木吟寒鳥空山嗥夜猿既傷千里目還驚九逝魂豈不憚艱險
深懷國士恩季布無二諾侯嬴重一言人生感意氣功名誰復論

隴右途中遭非語

員半千

趙有兩毛遂魯聞二曾參慈母猶且惑況在行路心冠冕無醜士
賄賂成知己名利我所無清濁誰見理敝服空庭春緩帶不著身
出遊非懷璧何憂乎忌人正須自保愛振衣在生塵

書懷

劉幽求

心為明時盡君門尚不容田園迷徑路歸去欲何從

自紀

皇甫松

皇天后地力使我向此生貴賤不我均若為天地情我家世道德
旨意匡文明家集四百卷獨立天地經寄言青松姿豈羨朱槿榮
昭昭大化光共此遺芳馨

贈友人

呂溫

南山雙喬松擢本皆千尋夕流膏露津朝被青雲陰負雪出深澗
搖風倚高岑明堂久不構雲榦何森森匠意方雕巧時情正誇淫
生材會有用天地豈無心

贈韓愈二首

孟郊

何以定交契贈君高山石何以保貞妍贈君青松色貧交過此外
無可相彩飾更有其鼠詩吟之堪淚滴其鼠既穿墉又齧機上絲
穿墉有閒土齧機無餘絲朝吟枯桑柘暮泣空杼機豈是無巧妙
絲斷將何施眾人尚肥華志士多飢羸願君保此節天意當察微
前日遠別離今日生白髮欲知萬里情曉卧半牀月常恐百蟲秋

使我芳草歇

贈喬林

劉育虛

去年上策不見收今年寄食仍淹留羨君有酒能便醉羨君無錢能不憂如今五侯不待客羨君不問五侯宅如今七貴方自尊羨君不過七貴門丈夫會應有知己世上悠悠何足論

寄唐生

白居易

賈誼哭時事阮籍哭路岐唐生今亦哭異代同其悲唐生者何人五十寒且飢不悲口無食不悲身無衣所悲忠與義悲甚則哭之太尉擊賊日段太尉以笏擊朱泚尚書叱盜時顏尚書叱李希烈大夫死兇寇陸大亂兵諫議譎蠻夷陽諫議左遷道州每見如此事聲發涕輒隨往往聞其風俗士猶或非憐君頭半白其志竟不衰我亦君之徒鬱鬱何所為不能發聲哭轉作樂府詩篇篇無空文句句必盡規切過虞人箴痛甚騷人辭非求宮律高不務文字奇惟歌生民病願得天子知未得天子知甘受時人嗤藥良氣味苦瑟澹音聲希不懼權豪

怒亦任親朋譏人竟無奈何呼作狂男兒每逢羣動息或遇雲霧披但自高聲歌庶幾天聽卑歌哭雖異名所感則同歸寄君三十章與君為哭詞

華下

司空圖

日炙旱雲裂迸為千道血天地沸一鑊竟自烹妖孽堯湯遇災數災數還中輟何事姦與邪古來難撲滅

傷時二首

孟雲卿

徘徊宋郊上不見平生親獨立正傷心悲風來孟津大方載羣物生死有常倫虎豹不相食哀哉人食人豈知逢世運天道亮云云太虛流素月三五何皎明光曜侵白日賢愚迷至精四時更變化天道有虧盈常恐今已沒須臾復更生

封邱作

高適

我本漁樵孟諸野一生自是悠悠者乍可狂歌草澤中寧堪作吏風塵下祇言小邑無所為公門百事皆有期拜迎官長心欲碎鞭

文卷十八
三
撻黎庶令人悲悲來向家問妻子舉家盡笑今如此生事應須南
畝田世情付與東流水夢想舊山安在哉為銜君命且遲迴乃知
梅福徒為爾卻憶陶潛歸去來

街西居三首

姚合

受得山野性任成多事違青山在宅南迴首東西睎淺淺一井泉
數家共汲之獨我惡水濁鑿井庭之陲自鑿還自飲亦為眾所非
吁嗟世間事絜身誠難為
日出窮巷喜溫然勝重衣重衣豈不暖暖氣人不齊兀兀復行行
不離階與墀
丈夫非馬蹏安得知路岐窮賤滄茹薄興與養性宜乃知長生術
豪貴難得之

效陳拾遺子昂

司空圖

醜婦競簪花花多映愈醜鄰女恃其姿掇之不盈手量已苟自私
招損乃誰咎寵祿既非安於吾竟何有

感時

好鳥無惡聲仁獸肯狂噬寧教鸚鵡啞不遣麒麟細人人語與默
惟觀利與勢愛毀亦自遭掩謗終失計

夜坐

張說

懷哉四壁時未有五都價百金誰見許斗酒難為賞落花生芳春
孤月皎清夜復逢利交客題戶遙相謝

無可奈何歌

白居易

無可奈何兮白日走而朱顏積少日往兮老日催生者不住兮死
者不迴況乎寵辱豐頓之外物又何嘗不一去而一來去不可挽
兮來不可推無可奈何兮已焉哉惟天長而地久前無始兮後無
終嗟吾生之幾何寄瞬息乎其中又如太倉之稊米委一粒於萬
鍾何不與道逍遙委化從容縱心放志洩融融胡為乎分愛惡
於生死繫憂喜於窮通倔強其骨髓齟齬其心胃合冰炭以交戰
祇自苦乎厥躬彼造物者于何不為此與化者云何不隨或煦或

吹或盛或衰雖千變與萬化委一順以貫之爲彼何非爲此何是
誰冥此心夢蝶之子何禍非福何吉非凶誰達此觀喪馬之翁俾
吾爲秋豪之杪吾亦自足不見其小俾吾爲泰山之阿吾亦無餘
不見其多是以達人靜則昭然與陰合迹動則浩然與陽同波委
順而已孰知其他時耶命耶吾其無奈彼何委邪順邪彼亦無奈
吾何夫兩無可奈何然後能冥至順而合大和故吾所以飲大和
扣至順而爲無可奈何之歌

逢白公

元稹

遠路事無限相逢唯一言月色照榮辱長安千萬門

感懷

費冠卿

螢燭不爲苦求名始辛酸上國無交親請謁多少難九月風割面
羞汗成冰片求名俟公道名與公道遠力盡得一名他喜我且輕
家書十年絕歸去知誰榮馬嘶渭河柳特地起愁聲

贈崔純亮

孟郊

食齋腸亦苦強歌聲無歡出門卽有礙誰謂天地寬有礙非遐方
長安大道傍小人智慮險平地生太行鏡破不改光蘭死不改香
始知君子交久久道益彰君心與我懷離別俱迴遑譬如浸蘖泉
流苦來日長忍泣目易衰忍憂形易傷項籍豈非壯賈生豈非良
當其失意時涕泗各滿裳古人勸加食此食難自強一飯九祝噎
一嗟十斷腸況非兒女冤冤氣凌彼蒼蒼若有知白日下清霜
今朝始驚呼碧落空茫茫

客喜

賈島

客喜非實喜客悲非實悲百迴信到家未當身一歸未歸長愁嗟
愁嗟填中懷開口吐愁聲還卻入耳來嘗恐滴淚多自損兩目輝
鬢邊雖有絲不堪織寒衣

有所思

宋之問

洛陽城東桃李花飛來飛去落誰家洛陽兒女好顏色坐見落花
長歎息今年花落顏色改明年花開復誰在已見松柏摧爲薪更

光祿

聞桑田變成海古人無復洛城東今人還對落花風年年歲歲花
相似歲歲年年人不同寄言全盛紅顏子須憐半死白頭翁此翁
白頭真可憐伊昔紅顏美少年公子王孫芳樹下清歌妙舞落花
前光祿池臺文錦繡將軍樓閣畫神仙一朝卧病無相識三春行
樂在誰邊宛轉蛾眉能幾時須臾鶴髮亂如絲但看古來歌舞地
唯有黃昏鳥雀悲

秦人謠

古之奇

微生祖龍代卻思堯舜道何人仕帝庭拔殺指佞草姦臣弄民柄
天子恣衷抱上下一相蒙馬鹿遂顛倒中國既版蕩骨肉安可保
人生貴年壽吾恨死不早

時興

楊賁

貴人昔未貴咸願顧寒微及自登樞要何曾問布衣平明登紫閣
日晏下彤闈擾擾路傍子無勞歌是非

聞碓有感

呂溫

千門儼雲端此地富羅紈秋月三五夜碓聲滿長安幽人感中懷
靜聽淚沈瀾所恨搗衣者不知天下寒

野田行

于鵠

日沒出古城野田何茫茫寒狐嘯青冢鬼火燒白楊昔人未為泉
下客行到此中還斷腸

贈馮宿

李觀

寒晨上秦原遊子衣飄飄黑雲截萬里獵火從中燒陰空蒸長煙
殺氣獨不銷冰交石可裂風疾山如搖時無青松心顧我獨不凋

偶然作二首

呂溫

棲棲復汲汲忽覺年四十今朝滿衣淚不是傷春泣
中夜兀然坐無言空涕洟丈夫志氣事兒女安得知

及第後答潼關主人

本欲雲雨化卻隨波浪翻一霄太常第十過潼關門志力且虛棄
功名誰復論主人固相問慙笑不能言

朝飢

賈島

市中有樵山此舍朝無煙井底有甘泉釜中乃空然我要見白日雪來塞青天坐聞西牀琴凍折兩三弦飢莫詣他門古人有拙言

九月訓顏少府

高適

簷前白日應可惜籬下黃花為誰有行子迎霜未授衣主人得錢始酤酒蘇秦憔悴人多厭蔡澤棲遲世看醜縱使登高只斷腸不如獨坐空搔首

觀玉篇

陳子昂

丙戌歲余從左補闕喬公北征夏四月軍幕舍于張掖河河洲草本無他異者唯有仙人杖往往叢生幽朔地寒與中國頗異余家世好服食昔嘗餌之及此役也而息意茲味戎人有薦嘉蔬者此物存焉余倏爾而笑曰始者與此君別不圖至是而見之豈非神明嘉惠將欲扶吾壽也因為喬公昌言其能時東萊王仲烈亦同旅舍聞而大喜甘心食之已旬有五日矣適有行人自謂知藥者

謂喬公曰此白棘也公何謬哉仲烈愕然而疑亦曰吾怪其味甜今果如此喬公信是言乃譏余作采玉篇謂宋人不識玉而寶珉石也余心知必是由以獨見之故被奪於眾人乃喟然而歎曰嗟乎人之大明者目也心之至信者口也夫目照五色口分五味玄黃甘苦亦可斷而不惑矣而路傍一議二子增疑况君臣之間朋友之際乎自是而觀之則萬物之情可見也感采玉詠而作觀玉篇以答之并示仲烈譏其失真

素絲

陸龜蒙

園客麗獨繭詩人吟五繆如何墨子淚反以悲途窮我意豈於是願參天地功為綫補君袞為弦繫君桐左右修闕職宮商還古風端然潔白心可與神明通

李都尉古劍

白居易

古劍寒黯黯鑄來幾千秋白光納日月紫氣排斗牛有客借一觀
愛之不敢求湛然玉匣中秋水澄不流至寶有本性精剛無與儔
可使寸寸折不能繞指柔願快直士心將斷佞臣頭不願報小怨
夜半刺私讎勸君慎所用無作神兵羞

廢琴

絲桐合爲琴中有太古聲古聲澹無味不稱今人情玉徽光彩滅
朱弦塵土生廢棄來已久遺音尚泠泠不辭爲君彈縱彈人不聽
何物使之然羌笛與秦箏

廢瑟詞

張籍

古瑟在匣誰復識玉柱顛倒朱絲黑千年曲譜不分明樂府無人
傳正聲秋蟲暗穿塵作色腹中不辨工人名幾時天下復古樂此
瑟還奏雲門曲

說劍

元稹

吾友有寶劍寶之如密友我寶膠漆交中堂共杯酒酒酣肝膽露

恨不眼前剖高唱荆卿歌亂擊相如缶更擊復更唱更酌亦更壽
白虹座上飛青蛇匣中吼我聞音響異疑是干將偶爲君再拜言
神物可見不君言亦可見復言我自取迎匣已焚香近鞘先澤手
徐抽寸寸刃漸屈彎彎肘殺殺霜在鋒團團月臨鈕逡巡潛虯躍
鬱律驚左右霆雷滿室光蛟龍繞身走我爲捧之泣此劍別來久
鑄時堇山破藏在松桂朽幽匣獄邊埋神人水心守本用稽泥淬
果非雷煥有我欲評劍功願君良聽受劍可割犀兕劍可切瓊玖
劍決天外雲劍衝日中斗劍隳妖蛇腹劍拂佞臣首太古初斷鼇
武王親擊紂燕丹卷地圖陳平縮花綬曾被掛樹枝寒光射林莽
曾經鑄農器利用剪稂莠神物終變化復爲龍牝牡晉末武庫燒
脫然排戶牖爲欲埽羣胡散作彌天帚自茲失所往豪英共爲詬
今復誰人鑄挺然千載後旣非古風胡無乃近鷗九自我與君遊
平生益自負況擊寶劍出重以雄心扣此劍何太奇此心何太厚
觀君慎所用所用無或苟潛將辟魑魅勿但防妾婦畱斬泓下蛟

莫試街中狗君今困泥滓我亦盆塵垢俗耳驚大言逢人少開口

春桂問答二首

王績

問春桂桃李正芬華年光隨處滿何事獨無花
春桂答春華詎能久風霜搖落時獨秀君知不

養鷺詞并序

劉禹錫

途逢少年志在逐絕方呼鷹隼以襲飛走因縱觀之卒無所獲行
人有嘗從事於斯者曰夫鷺禽飢則為用今哺之過篤故然也予
感之作養鷺詞

養鷺非玩形所資擊鮮力少年昧其理日日哺不息探鷓網黃口
且暮有餘食寧知下韝時翅重飛不得陪鯁止林表狡兔自南北
飲啄既已盈安能勞羽翼

對菊

賈島

九日不出門十日見黃菊灼灼尚繁英美人無消息

直鉤吟

盧仝

初歲學釣魚自謂魚易得三十持釣竿一魚釣不得人鉤曲我鉤
直哀哉我鉤又無食文王已沒不復生直鉤之道何時行

競渡

元稹

吾觀競舟子因測大競源天地昔將競蓬敷晝夜昏龍蛇相噴薄
海岱俱崩奔羣動皆攪撓化作流渾渾數極鬪心息太和承混元
一氣忽為二轟然畫乾坤日月復照曜春秋遞寒溫八荒坦以曠
萬物羅亦繁聖人中間立理世了不煩延縣復幾歲逮及羲與軒
炎皇熾如炭蚩尤扇其燔有熊競心起驅戰山林樊一戰波委燄
再戰火燎原戰訖天下定號之為軒轅自是豈無競瑣細不復言
其次有龍競競渡龍之門龍門浚如瀉淙射不可援赤鱗化時至
塘突鬚鬣掀乘風瞥然去萬里黃河翻接瞬電燧出微吟霹靂喧
傍瞻曠宇宙俯瞰卑崑崙庶類咸在下九霄行易捫倏辭蛙鼃穴
遠排天帝闈迴悲暴鯁者未免鯨鯢吞帝命澤諸夏不棄蟲與昆
隨時布膏露稱物施厚恩草木霑我潤豚魚望我蕃嚮來同競輩

豈料由我存壯哉龍競渡一競身獨尊捨此皆蟻鬪競舟何足論

冬日見牧牛人擔青草歸

張說

塞上縣應折江南草可結欲持梅嶺花遠競榆關雪日月無他照
山川何頓別苟齊兩地心問天將安設

道州觀野火

呂溫

南風吹烈火燄燄燒楚澤陽景當晝連陰天半夜亦過處若彗掃
來時如電激豈復辨蕭蘭馬得分玉石蟲蛇盡爍爛虎兕亦奔迫
積穢一蕩除和氣始融液堯時既敬授禹稼斯肇迹遍生合穎禾
大秀兩歧麥家有京坻詠人無溝壑感若悟焚如功來歲終受益

諭寶二首

元稹

沈玉在弱泥泥弱玉易沈扶桑寒日薄不照萬丈心安得潛淵蚪
拔壑起鄧林泥封泰山陞水散旱天霖洗此泥下玉照曜臺殿深
刻為傳國寶神器人不侵
水置白玉壺始見清皎絜珠穿殷紅縷始見明洞澈鎔錫無人淬

兩刃幽壤鐵春鏡無人拭一片埋霧月驥踟環堵中骨附筋入節
蚪蟠尺澤內魚貫蛙同穴舩艘無巨海浮桴矜濊潏棟梁無廣厦
顛倒卧霜雪大鵬無長空舉翮受羈紲豫章無厚地危祗真飢餓
圭璧無卞和甘與頑石列舜禹無陶堯名隨腐草滅神功伏神物
神物神乃別人神不世出所以神功絕神物有徒然用之有施設
禹功九州理舜德天下悅璧充傳國璽圭用祈泰折千尋豫章榦
九萬大鵬歇棟梁庇生民舩艘濟來哲蚪騰旱天雨驥騁流電掣
鏡懸姦膽露劒拂妖蛇裂珠生照乘光冰瑩環座熱此物比在泥
斯言為誰發凡今盡凡耳不為君不說

送春曲三首

劉禹錫

春向晚春晚思悠哉風雲日已故花葉自相摧漠漠空中去何時
天際來

春已暮冉冉如人老映葉見殘花連天是青草可憐桃與李從此
同桑棗

春竟去此去何時迴遊人千萬恨落日高臺寂寞繁華盡流鶯歸不來

衡州早春二首

呂溫

碧水何透迤東風吹沙草煙波千里曲不辨嵩陽道病肺不飲酒傷心不看花唯驚望鄉處猶自隔長沙

尋人偶題

邵真

日昃不復午落花難歸樹人生能幾何莫厭相逢遇

題花樹

楊衡

都無看花意偶到樹邊來可憐枝上色一一為愁開

惜花

陸龜蒙

人壽期滿百花開唯一春其間風雨至且夕旋為塵若使花解愁愁於看花人

秋日

耿緯

返照入閭巷憂來與誰語古道無人行秋風動禾黍

秋夕懷遠

孟郊

卧令無遠夢聽秋酸別情高枝低枝風千葉萬葉聲淺井不供飲瘦田長廢耕今交非古交貧語聞皆輕

蟋蟀詩

羅隱

頑颺斃芳吹愁夕長屑成有動歌離弔夢如訴如言緒引虛寬周隙伺榻繁咽黃緣范睡蟬老冠峨綏好不冠不綏爾奚以悲蚊蚋有毒食人肌肉蒼蠅多端黑白偷安爾也出處物兮莫累壞舍嘍衰虛堂泣署勿徇諠譁鼠豈無牙勿學萋菲垣亦有耳危條槁飛抽恨咿咿別帳釭冷柔魂不定美人在何夜影流波與子佇立徘徊思多

秋思

司空圖

身病時亦危逢秋多慟哭風波一搖蕩天地幾翻覆孤螢出荒池落葉穿破屋勢利長草草何人訪幽獨

在郡秋懷二首

張九齡

秋風入前林蕭颯鳴寒枝寂寞遊子思寤歎何人知宦成名不立
志在歲已馳五十而無聞古人深所疵平生去外飾直道如不羈
未得操割效忽復寒暑移物情有固然身退毀亦隨悠悠滄江渚
望望白雲涯露下霜且降澤中草披離蘭艾若不分安用馨香爲
庭蕪生白露歲候感遐心策蹇慙遠塗巢枝思故林小人恐致寇
終日如臨深魚鳥好自逸池籠安所欽挂冠東都門採蕨南山岑
議道誠愧昔覽分還愜今無然憂成老空爾白頭吟

文粹卷弟十八

文粹卷弟十九上

吳興 姚鉉 纂

頌一 總六首

盛德大業

無疆頌 李華

起義堂頌 僧一行 一云張說

開元正厯握乾符頌 張說

上黨舊宮述聖頌

龍池聖德頌 張九齡

靈武受命官頌 楊炎

無疆頌 并序

李華

臣華言伏以漢明帝時徼外蠻夷槃木白狼獻詩歌德屬事史官
況臣自曾祖至臣備國家職員臣又逮事玄宗肅宗今以餘年獲
事陛下官歷御史補闕尚書郎命薄多病不獲奔赴闕庭恐先朝

露同於泥塵若無歌詩頌德曾蠻夷不若也敢述列聖為無疆頌
式昭皇家大慶無窮謹昧死稽首以聞

高祖元頌

吳昊旻天 監於下旬 興有德行
維隋之杪 時黷陰疑 陽潛未登
人思昭矣 雷行龍興 盪濯秀慝
文明乎萬國 垂仁蒸人 載親天監
保我子孫 巍巍皇皇 後之皇
丕承之

太宗烈頌

高祖受天命 誕興太宗 承天之命
帝煬昏逾 黎人毒痛 甚熱于鑪
甚溺于塗 以號以呼 呼天無辜
高祖謂太宗 爾必有天下 爾其訐謨

太宗稽首

恭受天命

臣請滌除

張我師

撫征四國

翦薙羣慝

鼓一方

三方震驚

默昭其靈

隨顧而平

我負我乳

我安我成

以奉君父

以臨天下

任忠孝文武

建禮章樂舞

我雖明德

諫則納汝

時惟帝降佑之

自古明后

莫如我德

我勛唐無疆

天子之無疆

本太宗休命

高宗康頌

肇為址為堂

實勤實勤

付俾厥裔

丕承后帝

帝思不忘

神槩靜康

不耀而光

不求而昌

自中方

外達夷羌

瞻我大邦

助祭于廟

執貢朝于王

油油時雲

雨厥百穀

文粹十九上
二
漻漻景風
以厭以足

扇彼嘉穀
俾壽而福

飴口飽腹
都阜成天人

中宗興頌

屏蠱之毒

釁而為虺

謀虐天之族

天祐聖祚

八柱將覆

帝告五臣

保翼朕躬

赫赫彤彤

日升雲中

五臣受命

鉞爾頑兇

故曰再造我天下

生人鼓舞

既成矣

又奉父母

睿宗德頌

后戚之禍再興

有危兢兢

廟祧震怒

陰命聖子

翼登聖父

奮其神旅

宵杖金斧

金斧一斷

殄殲逆亂

大聖照臨

元元宅心

歸祚于有功有德

於戲盛德

玄宗文頌

丕鑠玄宗之明

克孝克仁

允武允文

宣祖宗之光

垂于子孫

盛禮畢舉

大樂畢陳

百蠻來賓

元元阜殷

戎或不賓

遣師徂征

罔不頓顙

蹈于雷霆

在漢方昌

用刑慘酷

中都繫考

六萬餘人

使者案錄

誅千萬人

其後賢王

光武赫赫

誅沛賓客

以千以百

孝明稱賢

楚獄連年

坐死逮捕

以萬以千

猶曰漢祚宜長

越我祖宗

不忍用刑

至于玄宗

哀彼鉄鎖

降為鞭扶

誕告郡國

大為屋室

醫彼百疾

追懷登遐

止害禽畜

旁為陂池

養麟介族 既濡既渥 寓縣晏然 若曰寧我負恥 不忍人戰死 西幸蜀都 父堯子舜 無不涕濡 嗚呼上聖

天念蒸人 乃告元子 命元子受圖 歸于國都 傳聖自頤 之道之純 不可度思

穆穆孝慈 爰訓六師 西戎南蠻 佐皇之威 福然邱岳

有如肅宗之誠 達于神祇 陵陵雷馳 咸舉其旂 無筮無卜 逆隸傾覆

肅宗孝頌

朝社大復 以舞以躍 蒸蒸其心 祀于陵廟 有兇有孽 則已顛蹶 仁覆而嚴 躬勤百度

今上昭頌

大邦之興 有德繼王 紹登殷明 疊引其慶 寔左右肅宗

維天相之 昔殷王 矧我帝唐 生我皇聖 開國御戎

曷興曷相 盤庚武丁 丕承天命 幼冲聖敬 羣師稟教

屈于海之外服 以盥以濯 孝如文王 既收鎬洛 天日並照 我旂方設 尊嚴而仁 莫不潔廉

帝在東宮 天地知其孝 奉迎上聖 將噬將齧 如燁於雪 大臣小臣 百度如其素

文粹十九上

再四

舉則成功

自西自東

如雲如風

蕩滌頑兇

罔不率從

既登大位

於變時雍

人咸曰

上如太宗

延億兆斯年

延億兆斯年

地博天崇

罔不爾容

玄宗元孫

象玄宗烈文

肅宗元子

承肅宗孝理

起義堂頌

并序

僧一行

張說

堯以天下禪舜舜以天下禪禹禹將宅百揆總萬國一讓于稷高再讓于皋繇稷高先舉彼商與周以之更盛皋繇後天我國家於茲受命非舜以考天而疇咨審靈命之陰隲非禹以享天而德讓知麻數之有歸及乎玄宗間出光大前慶垂道德而統運依清虛而立法天祚我李厥惟舊哉并州起義堂者皇天造帝之初高祖誓眾之地也隋氏失御國亂無家小道自賢大才胥忌惟宮室陂池之好惟沈緬暴慢是保上帝不歆黎人咸咸六軍踰海而東敗

萬乘過江而南覆豺狼入邑猘兪爭人黔首囂然方將無訴我高祖感之乃龍躍晉水鳳翔太原百神前驅萬姓來奔開咸陽入天門用湯武之兵崢新室之亂遵唐虞之典承太王之基率百官受終于文祖輯五玉班瑞于諸侯類圓禋方之禮備封功爵德之議允約法惟簡代虐以寬子惠困窮懷柔蠻貊金石一變日月重華近古以來未有革命易姓若此之盛者也非天私我有唐惟天祐于積德非唐求于人庶惟人懷于累仁當此之時太宗內啟聖謀外行專斷躬擐甲胄跋履山川駕英雄而為奧主一區域而定大業周詩曰昊天有成命二后受之信今之謂也若夫脩德以降命奉命以造邦源濬者流長根深者葉茂天人報應豈相遠哉觀周之興始於后稷公劉承以大王王季皆勤儉忠厚克廣前烈至于文王成之武王啟之康王安之故卜世三十卜年八百天所命也我唐之興也始於皋繇玄宗承以景皇元帝皆立言邁德垂裕後昆至於高祖受之太宗有之高宗守之中宗復舊業睿宗新景命

比之周室我何謝焉且如陳德明刑庶其躬稼之績玄宗道要小
其避狄之仁化流率土狹其江漢之域義寧大朝羞其牧野之戰
故武德中太行出大聲曰唐興理萬年蓋天之所命年代未可涯
也仲尼曰惟天爲大惟堯則之又曰韶盡美矣又盡善也非至德
其孰能如此其大者乎於戲先后捨元子而立予主鬯煩大位而
付予天下自高祖創業百有六載欽承丕緒十有四載東西南北
無思不服山川鬼神亦莫不寧實惟藝祖儲福之所致豈予幼孫
菲德之能及方將運心于玄妙之境勵志于造化之鑪發令爲祥
符施惠爲霖雨任賢爲兩曜仗能爲四時俾溥天之下有形者遂
全懷生者自足樹鋪野繭田種嘉穀斲雕爲樸捐珠棄玉追大庭
而齊風夢華胥而同俗非曰能爾願憑宗祏而效焉癸亥之歲獻
春正月濟河橫汾省方展義存問黎老緬慕本邦城郭巋然桑梓
如舊覽風物之憂思尋王業之艱難惟高祖若天地之開闢化成
萬類惟太宗若日月之照臨光于四表舉晉陽之甲除君側之盜

由唐侯之封升天子之號肇基發迹實在於茲仙駕無所或顧懷
于舊土靈魄無方儻來歸于北堂郡縣之所宜嚴奉前人有言曰
禮不忘本樂保其德如姬詠周原而劉歌沛邑思我烈祖如聞歎
息之音嗟爾後人無忘成功之頌頌曰

皇矣上帝臨下有赫降監四海求人之瘼吁彼隋煬其政不獲眷
我高祖此惟其宅天輔皋繇明刑弼教道尊老氏同玄體妙仁表
四乳明融獨照隨父託心史良辨貌高祖誕靈神光夜耀天妹作
合日兄夢紹祚生文帝膺運會昌首唱高祖鸞飛晉陽萬夫一心
元戎啟行火旗炎炎雲鳥洋洋五星迓帝萬國謳唐天網恢疏王
師節制威惟連戮老生摧斃山祇引軍河龍渡帝渭倉散積離宮
弛閉關輔來蘇遠方咸惠長安宮室上法太微隋遷寶鼎唐在璿
璣仗入雙闕詔出九圍三靈協載百祿同歸帝謂太宗表正封略
濤蕩颺埽霆馳電爍劔不摧鋒弩無再曠西平汧隴東取河洛杲
密德充頭懸面縛北走獯鬻南達蠻荆遼碣作父梁岐底平風動

神行海隅蒼生莫不來庭於昭義堂誓眾資始天命所起于胥頌
美維予小子夙夜敬止於戲皇王緒思不忘

開元正麻握乾符頌

并序

張說

客有嘲臣曰聖主正新麻握乾符百僚賡歌以美時六合鼓舞以
頌德先生獨晏默書閣含翰詞林奚其爲僿儼也臣應之曰斗水
不能評巨壑之量隙光未足議大明之體何者見漏而守隘也握
乾符者不謂執天命歟執天命者非夫廣德休麻交相表裏況命
者夫子之所罕言也焉可偏贊而總握符之盛哉如作者略大本
舉小節不亦仲尼之門所聽瑩也是以涸思乾慮久難其述客無
異焉客曰請終餘論粵若我大唐慶始白雲道昇紫氣屬漢東失
馭淮南不返高祖舉晉陽之甲戡定關西太宗因後后之師削平
天下高宗收圖海外檢玉封中九域黎人重代飲澤雖鳴鸞改號
神龍中興周鼎歸唐玄圭祀夏中宗違代雙孽窺國於是乎聖上
起藩邸入鈞陳一麾水心羣兇泥首崇復大聖越踐少陽受禪當

寧而光大前烈垂統拜璧而慎靈後嗣四海有覆孟之安百代無
委裘之隙是之謂聖人握符之大寶也四星入輔五將出禦倚禮
樂爲國計仗仁義爲軍勢英賢集殿而文教成千戚舞階而武功
振敬讓光於九族孝慈行於萬宇磧嶂西南渤海東北熾皮火毳
喝炎山污熱海向風來王黑貂駮浮天溟絕冰漠連歲獻款鳥
獸無猜人之意草木無不達之氣升中于天比天同貴是之謂聖
人握符之大政也歷試上黨黃龍飛天入清中禁白虹指日瘞汾
雕寶鼎見柴岱宗卿雲蔚非應事而呈瑞者雖多狎而不紀矣是
之謂聖人握符之大祥也以數推氣以氣定朔以星殷時以閏成
歲考星問而革疏度置歲差而辨誤日立大衍之紀參大渾之晷
合鍾律之聲極鬼神之情是之謂聖人握符之大麻也若夫仁聖
根於內菁華發於外祥兆祕於前謠讖灼於後自然之理也彼洛
下閎者漢太初時一巧麻耳其云後八百歲當差一日有聖人正
之斯人也抑將露才揚術預證來聖有耆舊之傳記無史策之明

文然至隋之開皇及麟德聖曆三家創法一引爲徵約之年代則
鄰近稽之圖籙則曖昧未有如新曆之昭昭者矣昔在唐虞之際
以斗精受命者七神得四均閒氣而生者又二十八人所謂三十
五際者也禹以金德王故夏后之有天下也生數四百年契以水
德王故殷人之有天下也成數六百年稷以木德王故周人之有
天下也成數八百年伯益之命中天而堯族以火德乘之故漢室
之有天下也生數再及二百年其閒距王而興不能復大禹九州
之跡及勝殘百年之命者皆五神之餘氣也皋繇降德皇唐復興
土精應王厚德載物生數五百成數千年命曆有歸此其大較修
德增祚與天無窮轉筭之徒莫能究也緯以入元三百四歲爲德
運七百六十歲爲代軌千五百二十歲爲天地出符四千五百六
十歲爲七精返初天人相應合若符節自堯典命羲和修重黎之
舊理顓頊之曆上元甲子千五百餘歲得孔聖而春秋之曆序暨
開元十二年甲子凡三千四十歲遇聖上而大衍之曆興是時也

土德入生數之元天命當出符之會信矣伏惟聖上聰明文思道
德之具也豁達大度皇帝之體也藝總六經漢光之學也文通三
變魏祖之才也緣情定制五禮之本也洞音度曲六樂之宗也神
於弧矢黃軒之威也聖於翰墨蒼頡之妙也兄弟友善王季之心
也子孫眾多周文之福也大寶以定天位大政以布廣德大祥以
合靈符大曆以啟成命德位兼才臨照如此符命介福粲彰如彼
所謂廣德休曆交相表裏之效也善曆者必推來運以自神興王
者不俟往言以表聖設徵夫洛下閎之語也其不有容成之事乎
且如恃有命比於日孰是夏王之福也賴卜年衰其德豈謂周公
之訓也故曰王者執天命在於俟天符致天符在於順天德布天
德在於保天位四者備矣然後陳其盛德告於神明捨此道也胡
可語正天曆握乾符哉諛臣懵學謝生立造樂虞典之歌舜羨周
詩之美文敢不敷信辭薦清樂厭上客之誚原作獻上託眾篇之
後云爾

維皇六葉於赫啟聖步玉斗握金鏡地維續天柱正山川授方雷
雨施令清廟九祐堯門百慶郊稷尊祖擇昌定命德自我流藝從
我修龜易八卦龍書九疇文含玉律字吐銀鉤鳴絲鶴舞調箭援
愁集賢榜殿花萼名樓神用外表事行先兆萬目朝徹千心暗曉
卿雲爛漫黃龍窈窕遊姑射神人宵登太山天下小飛祥定瑞均
靈躋類鞮譯窮天琛維盡地爍此金戟鑄爲農器匪直也然探玄
索祕軸止輪運辰居星轉得一神凝吹萬情辨發斂潛合晦明幽
闡階莫朝開宮槐夜卷正我長麻同符大衍天地清焉日月貞焉
四時行焉萬物生焉窮神知化美功成焉金版玉牒遠頌聲焉

上黨舊宮述聖頌

并序

維開元十有一祀正月皇帝展義于河東挾右太行留宴上黨整
兵耀武入于太原設都建頌以崇王業南轅汾睢祈穀后土天清
日朗神歆如答三月庚午飲至長安六軍解嚴四方和會邇觀法
象遐詠德澤大虞巡之典修美漢祠之禮舉人心翕而一變神物

效而無方於是邠王臣守禮寧王臣憲申王臣撝岐王臣範薛王
臣業獻書於內開府儀同三司臣瓌尚書臣峻臣象先臣頰御史
大夫臣灌抗疏於外僉曰陛下受天庥數稽聖典謨道貫三靈仁
育萬類埽陰沴而覩日開闢之功也尊文考而御天帝王之孝也
天以陛下爲子人奉陛下爲君萬殊之福斯應畢臻三代之風頌
聲咸作今路人懷代邸詠泗亭採聖崖延立石將表潛龍之館勒
啟聖之圖勤亦至矣陛下推而不報其何以下塞眾望上對神休
哉臣聞天之所啟人之所戴必憑睿聖玄懿之德元命眞符之紀
功業見乎變德施加乎時德厚者施溥功立者應速或階晦以彰
或由難而昌蓋生其德之謂天授其時之謂命天有成命其可沒
乎陛下昔居是州也紫雲在天神光照室白鹿來擾黃龍上昇隴
出仙洞而神魚躍山開禪穴而靈鍾韻謠言合讖巨迹引途嘉李
傍連祥著自起當此時也金石預變獄訟先歸政殷六府人重五
教陶無窳器漁有讓泉神而化之人不知力昔龍負圖而大舜登

狼銜鉤而后殷昌玄珪錫於夏禹赤伏歸於漢光應運協符希代
稱寶未有窮祥極瑞倣儻環異如今之至者矣若玄貺集而不彰
則神心不悅鴻業成而不贊則祝告無聞是掩天休而蓋聖德也
臣子之罪將何解焉願聽潞人以揚丕烈帝曰往者中宗違代國
步微艱天祚我唐大命集于睿宗大聖眞皇帝朕畏天將命不敢
怠違其乾符坤珍皆先聖之餘福朕何力之有焉然重違昆弟公
卿之請抑心敬從無爲虛美重朕不德也羣臣遊聖蕩莫能名約
乎舊史敢頌成績辭曰
帝德廣運乃聖乃神天祚聖兮唐雖舊邦其命維新再受命兮帝
初正人降居上黨天下往兮黃龍晝見攀天而上九五象兮帝適
于野紫雲之下求必在今帝寢于堂變龍有光觀者駭兮天迹童
謠木連著立總神異兮靈鍾化穴縞鹿赤魚何詭異兮上天無聲
託類附形覺悟人兮聖皇齋栗在得戒失昭事神兮皤皤潞老樂
我王道愛舊宮兮赫赫頌功與天比崇攄無窮兮

龍池聖德頌 并序

張九齡

臣聞昔者玄德升聞皇天眷命元聖有作上帝何言而必見意於
休徵忘象於幽贊惟茲降鑒若曰專精道周萬物者其魄充功濟
生人者其祥大粵若古始肇有君臣巢燧之前寂寥無紀書契之
後炳煥可觀若乃鬼神睚眦品彙紛錯性命未正吉凶不定而太
昊氏將通其德則河爲之出圖人食未粒鳥獸是茹時不耕稼器
無耒耜而神農氏將教其本則天爲之雨粟蚩尤不道炎帝不制
銅鐵鑄兵豺狼橫厲而軒轅氏將禁其暴則天爲之降玄女洪水
方割下民昏墊堯德莫能弭厥災舜功不能除其害而夏后氏將
底其績則洛爲之出書自茲已降蓋三千歲矣其閒木火更王雲
物告符有若狼銜鉤魚躍舟素靈出黃星見豈不以湯德有慙武
善未盡漢道旣雜魏方亦偏唯以一至之應且爲興王之兆則未
有天錫眞符聖受休命遠與大禹相續超與上皇比崇如我國家
之盛者焉洪惟龍池蓋天之所以祚聖卽今上下居之舊里京師

爽塏之地傍無寶澤中忽濫泉非常而靈液涓流無幾而神池寢
廣榮光休氣若煙若雲所未曾有則此之出雖清可以鑑而深不
見底鱗介瑰詭充物其中時莫知其所然日徒見其有異中宗採
識者之議壓王氣而來遊聖上處或躍之時出飛龍而合應臨淄
始封也邸第在焉上黨歷試也靈符紹至天其以是永命我唐圖
象丁寧有所底止其若茲也夫成數有時而否至理無代而亡固
在乎大聖之生也乘運而作鼓天下之動安天下之危故將順成
功自古之啟佑之也如彼克定多難自天之叶贊之也如此初中
宗違代后黨窺隙大盜狃於得志羣慝起而擅朝若綴旒然當此
時也天與若不取鬼謀若不協則我祖宗之業無乃將墜而億兆
之命亦猶倒懸聖上感之提劍而起雷霆一奮妖沴以清內難既
衰外虞有謚推戴太上照臨萬邦實天之爲與人更始系皇統維
乾綱決綻補壞蕩瑕滌穢而乃闕典咸備舊章悉舉處窮盡達在
困必通品物資以再生寔區爲之一變然後反華僞於朴還澆醜

於醇以大道爲源以至仁爲根動推是心以御於事人見德而興
行神享誠而介福故不在於刑罰亦不在於禱請大造化成玄猷
允塞有如陽春播澤觸類皆滋泰山起雲無遠不徧雖昆蟲草木
與蠻貊要荒樂其所生安其所習在牛羊而勿踐有干戈而載戢
又況於衣冠華夏禮樂邦家而不形於斯須不彰於漸漬者也夫
然何教非德何化非經何能事之不舉何醇精之未極周溥洋溢
於穆緝熙至於太和莫不允若體包天地之大事出皇王之表豈
擊跼曲拳盡禮極力將用彥聖不啻其口所能稱誦於吾君所可
殆庶於至德且往者之有開也天感精以降聖聖敬命以奉天此
誠有元則欽明文思及茲報本必嚴祇齊栗靈慶以屬之神化以
答之與初相明其微乃著紛綸先兆非篤信歟由是言之統天者
人合符者聖而美德序命殊尤卓絕豈多乎哉至于古之興王必
有所感五帝更尙五運傍通土者黃中之精於金爲母水者善利
之物於土爲妃苟應期而有來必合德而爲表是則然矣天其或

者亦以阜育羣化發揮蕃祉始告以聖有明徵終成乎帝之神册
因其立象之本會以相乘之數則載祀六百厥紀千年變而通之
胡可量也宗子宗正卿褒信郡王璆等若干人伯父伯兄仲叔季
弟聚族相與詣闕上言天意昭著固已久矣人事符合亦云至矣
而一德是建太階既平靈臺靈沼赫赫明明天之為大雖莫能名
王之在鎬豈無頌聲上初克讓抑而未許至於累請乃曰俞哉史
臣不敏敢獻頌曰

茫茫元昊載凝載薄在帝庖羲繼天而作浩浩洪水包山襄陵舜
亦命禹夏氏以興龍圖龜書二王是膺湯武已下夫何足徵右元命
於爍巨唐乘運而起纘禹之統系堯之紀五聖在天丕命曾孫高
視河洛同符混元亦有黃龍出於靈沼明明穆穆天子之表右聖德
倬彼東井昭章于天沈精降液下為靈泉泉靈有泚其深無底泌
之洋洋其甘如醴清德之鑑柔道之體洪源濬規實天所啟右靈泉
濯濯靈泉洞冥皇祇滋液流行化為神池曰止曰行惟聖之作匪

鱣匪鮪惟龍之躍植物斯生動物斯樂天根有見曾是不涸右神池
靈有休氣紛紛郁郁如山之苞如雲之族潛龍在下瞻烏在屋兆
云其吉周爰咨詢既契我龜又叶我人鎬雖舊京其命維新右休氣
蜿蜿黃龍神池自出靈化惚恍噴雲沃日告帝之符其儀孔佶或
潛于泉或見在田與時順動亦應于天克配我皇無得稱焉右黃龍

靈武受命宮頌

并序

楊炎

臣聞享天降命惟德也戡難奉時惟聖也必有非常之運是興撥
亂之君以蒼生為憂不以濡足為患以寧濟為業不以修身為道
此陶唐所以捨而不畏舜禹所以受而不疑靈武舊宮皇帝躍龍
之所日者姦臣竊命四海蕩波我聖皇天帝探命厥之數啟龍圖
作受命之書付于我皇帝皇帝方遊崆峒以求至道於是羣公卿
士負玉旒金璽望氣於芒碭之野三進於閭闔之中曰臣聞在昔
蚩尤連禍大盜中國神農氏兵莫能勝天降玄女勅軒轅氏大定
其災厥後堯有九州之害而命禹禹以四海之功而受舜陛下主

嚳大位十有九年精爽者皆美德馨乾坤也必聞幽贊玄德上達景福有歸六聖覩命祿之期兆人有臨難之請陛下畏災運而不處棄黎元而不顧以至仁爲薄以大寶爲輕臣等若不克所請與億兆之眾將被髮拊膺號於天而訴於帝矣皇帝唯然改容曰豈人心歟丁卯廣平王俶太尉光弼司徒子儀尙書左僕射冕兵部尙書輔國與北軍將士西土耆老萬五千人排闥以訴帝曰今豺狼穴居宮闕陛下兆庶爲餌宗廟爲墟若臣等誠懇未通是高祖不歆於太廟且陛下涉渭則洪流涸迴鑾則慶雲見布澤而川池廣勤道而嘉禾生靈祗髣髴玄貺幽感臣聞符命待聖而作天運否終而會歲蕤臍蠶會也睿武英明聖也臣等敢昧死上聞帝乃灑齋宮啟金匱鳴咽拜受詔有司大赦天下改元曰至德元年尊聖父爲文武太皇帝是日煙雲變作土氣踴躍黃龍見於東郊紫氣滿於天門翌日也數百里衣裳會兼旬也數千里朝貢會踰月也天下兵車會浹時也四方戎狄會以一旅成百萬之師率胡夷

平社稷之難禮郊祀戴聖皇與人合誠心以氣消天癘動罔不吉歆無不報是以白鹿擾於王庭靈芝產於延英化動而功成淵默而頌聲言禪代者陋蒼梧易姓之名語嗣守者羞唐堯積善之辱述戡定者歎四紀而復夏美中興者嗤四七而滅新於戲神祇之所歸往品物之所法象鼓飛龍於尺水仗大義而東嚮矢謨發號實在茲都願篆石宮庭以垂萬古俾過山澤知風雨之奧窮造化識天地之鑪臣炎稽首敢獻頌曰

赫赫河圖啟天之祐雲從億萬皇在九五惟昔陶唐克傳舜禹漢也武也夫何足數彼祆者勃惟暴惟貪天實卽命人將不堪皇曰內禪于再于三盡武之善去湯之慙兵車百萬洶洶雷震橫會九州爲行爲陣恃力者踣從命者順孝以奉天神而撫運至德唐堯崇功大禹皤皤北叟垂白而覩沛邑空歌周原已古徘徊頌聲永介茲土

文粹卷第十九下

吳興 姚鉉 纂

頌二 總三首

封禪

紀泰山銘 玄宗御製

大唐封禪頌 張說

大唐封東嶽朝覲壇頌 蘇頌

紀泰山銘

玄宗御製

朕宅帝位十有四載顧惟不德慙於至道任夫難任安夫難安茲
朕未知獲戾於上下心之浩蕩若涉於大川賴上帝垂休先后儲
慶宰衡庶尹交修皇極四海會同五典敷暢歲云嘉熟人用大和
百辟僉謀倡予封禪謂孝莫大於嚴父謂禮莫尊於告天天符既
至人望既積固請不已固辭不獲與夫二三臣稽虞典繹漢制
張皇六師震疊九寓族旅有列士馬無譁肅肅邕邕翼翼溶溶以

至于岱宗順也爾雅云泰山爲東岳周官曰兗州之鎮山實惟天
帝之孫羣靈之府其方處萬物之始故稱岱焉其居稱五岳之伯
故稱宗焉自昔王者受命易姓於是乎啟天地薦成功序圖錄紀
氏號朕統承先王茲率厥典實欲報立天之眷命爲蒼生之祈福
豈敢高視千古自比九皇哉故設壇場於山下受羣方之助祭躬
封燎於山上冀一獻之通神斯亦因高崇天就廣增地之義也乃
仲冬庚寅有事東岳類于昊天應乙字上帝配我高祖之神罔不畢
降粵翌日禪於社首侑我聖考祀於皇祇在地之神罔不咸舉暨
壬辰觀羣后上公進曰天子膺天符納介福羣臣拜稽首千
萬歲慶答歡同陳誠以德大渾叶度彝倫攸敘三事百揆時乃之
功萬物由庚兆人允殖列牧眾宰時乃之功一二兄弟篤行孝友
錫類萬國時爲休哉我儒制禮我史作樂天地擾順時維休哉蠻
夷戎狄重譯來貢累聖之化朕何慕焉五靈百寶日來月集會昌
之運朕何感焉凡今而後做乃在位一王度齊象法權舊章補缺

政存簡易去煩苛思立人極乃見天則於戲天生蒸人惟后時又
能以美利利天下事天明矣地德載物惟后時相能以厚生生萬
人事地察矣天地明察鬼神著矣惟我藝祖文考精爽在天某曰
懿予幼孫克享上帝惟帝馨香其下丕乃曰有唐氏文武之曾孫
隆基誕錫新命續我舊業永保天祿子孫其承之予小子敢對揚
上帝之休命則亦與百執事尙綏兆人將多于前功而茲彼後患
一夫不獲萬方其罪予一人有終上天其知我朕惟寶行三德曰
慈儉謙慈者覆無疆之言儉者崇將來之訓自滿者人損自謙者
天益苟如是則軌迹易循基構易守磨石壁刻金記後之人聽詞
而見心觀末而知本銘曰
惟天生人立君以理惟君受命奉天爲子代去不留人來無已德
涼者滅道高斯起赫赫高祖明明太宗爰革隋政奄有萬邦罄天
張宇盡地開封武稱有截文表時邕高宗稽古德施周溥茫茫九
夷削平一鼓禮備封禪功齊舜禹巖巖岱宗衍我神主中宗紹運

舊邦惟新睿宗繼明天下歸仁恭己南面網緼化醇告成之禮留
諸後人緬予小子重基五聖匪功伐高匪德矜盛欽若祀典丕承
永命至誠動天福我萬姓古封泰山七十二君或禪奕奕或禪云
云其迹不見其名可聞祇適文祖光昭舊勳方士虛誕儒書齷齪
佚后求仙誣神檢玉秦災風雨漢汙編錄德未合天或承之辱道
在觀政名非從欲銘心絕巖播告羣岳從石刻本校正

大唐封禪頌

張說

皇唐六葉開元神武皇帝再受命致太平乃封岱宗禪社首鑿石
紀號天文煥發儒臣志美立碣祠壇曰厥初生人俶有君臣其道
茫昧其風朴略因時而歛起與運而紛落泯泯沒沒無聞焉爾後
代聖人取法象立名位衣裳以等之甲兵以怛之於是禮樂出而
書記存矣反其源致敬乎天地報其本致美乎鬼神則封禪者帝
王受天命告成功之爲也閱曩聖之奧訓考列辟之通術疇若天
而不成曷肯道而靡失由此推之封禪之義有三帝王之略有七

七者何傳不云乎道德仁義禮智信順之稱聖哲逆之號狂悖三
者何一位當五行圖錄之序二時會四海昇平之運三德具欽明
文思之美是謂與天合符名不死矣有一不足而云封禪人且未
許其如天何言舊史者君莫道於陶唐虞舜臣莫德於皋陶稷尚
三臣降德皆有天下仲尼敘帝王之書繫周秦之誓明魯祀周公
用王禮秦承伯益接周統孔聖微旨不其效歟然秦定天下之功
高享天祿之日淺天而未忘庭堅之德也故大命復集于皇家天
之贊唐不惟舊矣其興之也玄靈啟迪黃祇顧懷應歸運以義舉
撫來蘇以利見獲也無放夏之慙武也無伐殷之戰高祖創業四
宗重光德有格天漏泉蒸雲濡露菌蠢滋育氤氳涵煦若天地之
覆載日月之照臨溥有形而歸景罄無外而宅心百有八年于茲
矣皇帝攘內難而啟新命戴睿宗而纘舊服宇宙更闢朝廷始位
蓋羲軒氏之造皇圖也九族敦序百姓昭明萬邦咸和黎人於變
立土圭以步厯革銅渾以正天蓋唐虞氏之張帝道也天地四時

六官著禮井田三壤五圻成賦廣九廟以尊祖定六律以和神蓋
三代之設王制也武緯之文經之聖謩之神化之然猶戰戰兢兢
日慎一日納規誨以進德遂忠良以代工講習乎無爲之書討論
乎集賢之殿寵勇爵貴經明翼乎鵠鸞之列在庭毅乎貔豹之師
居鄙人和旁感神寶沓至乾符坤珍千品萬類超圖溢牒未始聞
記我后以人瑞爲心不以物瑞爲意王公卿士儼然進曰休哉陛
下孝至于天政合乎道前年祈后土人獲大穰間歲祀圖丘日不
奄朔感祥以祚聖因事以觀天天人交合其則不遠意者喬岳埽
路望翠華之來上帝儲恩俟蒼壁之禮久矣焉可專讓而廢舊勛
羣臣固言勤帝知罪至于再至于三帝乃挹之曰欽崇天道俯率
嘉話恐德不類敢憚于勤其撰巡狩之儀求封禪之故旣而禮官
不戒而備軍政不謀而輯天姥練日雨師灑道六甲按隊八神警
蹕孟冬仲旬乘輿乃出千旗雲引萬戟林行霍溲燐爛飛焰揚精
原野爲之震動草木爲之風生歷郡縣省謠俗問耆年舉百祀興

墜典葺闕政攸徂之人室家相慶萬方縱觀千里如堵城邑連歡
邱陵聚舞其中垂白之老樂過以泣不圖蒿里之魂復見乾封之
事堯雲往舜日還神華靈鬱爛燁乎穹壤之間是月來至于岱宗
祇祓齋宮滌濯靜室凝神玄覽將款太一議夫泰山者聖帝受天
官之宮天孫總人靈之府自昔立國莫知萬數克升中而建號惟
七十而有五我高宗六之而今七矣非夫尊位盛時明德曠代遼
闊難并之甚哉先時將臻夫大封也累封疆於高岡築泰壇於陽
趾夫其天壇三襲辰陞十二咸秩眾靈列坐有次崇牙樹羽管磬
鏞鼓宮懸於重墮之內千戚釵及鉤戟戮戰周位於四門之外伐
國重器傳代絕瑞旅之於中庭玉輦金轂翠冒黃屋夾之於端路
席官百辟羌夷蠻貊裹成之後讓王之客序立於禮神之場髦頭
駑牙鐵馬金鏃介冑如雪旗幟如火遠而於清禁之野於是乎以
天正上元法駕徐進屯千乘於平路留羣臣於谷口皇帝御六龍
陟萬仞獨與一二元老執事之人出天門臨日觀次沆漭宿巉巖

赤霄可接白雲在下庚寅祀高祖於上封以配上帝命眾官於下
位以享眾神皇帝冕裘登壇奠獻俯僂金奏作佾羽舞撞黃鐘歌
大呂開闔闔與天語請將信公奉斗布度懋建皇極勤恤蒼生昭
假乎未兆禳災乎未萌上下傳節而禮成樂遍福壽同歸而帝賜
神策乃檢玉牒於中頂揚柴燎於高天庶衷誠之上達若憑燄而
駕煙日轡方旋神心餘眷五色雲起拂馬以隨人萬歲山呼從天
而至地越翌日尊睿宗侑地祇而禮社首遂張大樂觀東后國風
惟舊無黜幽削爵之誅王澤惟新有眚災大賚之慶不浹日至化
洽於人心不崇朝景福徧於天下然後藏金匱於祔室迴玉鸞於
上都煌煌乎真聖朝之能事而高代之盛節者也于斯之時華戎
殊俗異音同歡曰兵合多雨山峻多雲豈有大舉百萬之師尅期
千里之外及行事之日則天無點翳地無纖塵嚴冬變為韶景寒
谷鬱為和氣非至德其孰能動天如此其順者乎昔人云自西自
東自南自北無思不服今信知聖人作而萬物覩其心服之之謂

矣或曰祭泰折主先后非禮歟曰是禮也非宜也王者父事天母
事地侑神崇孝無嫌可也且夫柴瘞外事帝王主之蒸嘗內事后
妃助之是開元正人倫革弊禮起百王之法也故令千載職末光
聆絕韻咀甘實漱芳潤爍玄妙之至精流不已之淑聲臣說作頌
告于神明四皇墳而六帝典雖吉甫亦莫能名徒採彼輿人之詩
曰大矣哉維天為大惟皇則之率我萬國受天之祺子孫百代人
神共保綏之云爾而已矣

大唐封東嶽朝覲壇頌 并序

蘇頌

封祀之山五在中國泰嶽首之昊穹之命再集巨唐皇帝受之臨
位十四年考虞氏歲巡之義諷周王時邁之什十月辛酉步自有
洛十一月景戌帳殿齋於岳趾淵默以清釋思而照將紀功布度
順斗承天精享也已丑宏觀軼區宇盛儀振開闔高臨建鳳萬隊
張皇以燭山上御飛龍百神翕習以扶道國台二藩后四髦士密
侍信臣高位扈封臺列升陞不下五十以聖言冲逸瑤牒寶書誓

之旨曰朕獲守丕業恐不克駿命惟上帝儲休錫蒼生無疆之慶
朕之慶也古則祕之何哉屬寒馳迅飈露清終夕若埽若鋤晏然
而已庚寅天官次籙王制協時嚴高祖以配之嗣高宗以陟之冕
裘立珪璧序潔鬯俎調鍾呂倨句於龔篋戛擊乎祝敵寶駢瑞兮
物焜煌空薄霄兮音容與則纖塵不動和氣充塞日在於觀天爲
之門揚日大光謂小天下昭以抱戴見之卿霽郁郁紛紛喜氣煙
燼當芝檢引紫薰太紫洞而三辰接鬱蒼搖而萬歲聞自下達上
俟吾君君之來兮望如雲雲之眸一作端兮聖之門至辛卯有事于
社首以泰折如泰壇於穆我睿宗侑而作主奠獻嗚咽天子之孝
也僉以金匱歸助於祖禰石礮藏美於乾坤戒咸秩則司存癸巳
載大旂合大樂三陔峒以帷抗四亞鏘而輅止朝羣牧揆干官底
邦賦數庭實華蟲辨等車馬來觀周人隨人二王之賓戎狄蠻貊
萬里重譯必拱于蒼執贊奉璋顛顛昂昂靡敢怠遑乃建雞竿伐
鼉鼓帝命出皇恩溥揚巽風作解雨施舍之蕩滌之宥法罪除頗

類頌湧洋溢周流黜不崇朝而徧者與此山俱疇翳而不拔胡
微而不鋪也亦既稱壽申命宗伯咨爾頌焉效古之刻石臣頌稽
首再拜而言曰

臣聞昔在帝堯臣惟咎繇聰明謂之聖邁種謂之德天若曰依于
巨唐易姓者李王于中華崇功者唐聖之澤德之浸也我唐祚之
興昌符誕膺兩儀動六葉承皇帝宣高祖四宗之景烈肇開元神
武之明號廣矣大矣莫有不靈罔有不俾咸一德之輔不二心之
臣羣后抗詞曰臣聞先王因天事天因地事地因名山升中于天
陛下得天之經得地之義得人之行行也者孝莫大焉兼三才以
爲政政也者仁莫大焉含萬物以爲性今三才貞萬物亨六典平
九功成官不涓獄不放至于刑清良有以也因斯而談清明在躬
志氣如神之睿者君也四國于藩四方于宣之美者臣也有物有
則我君臣保乂之原所由於前設其教於後爾往歲邦危中否天
討內難陛下提三尺之劍班闔闔絕句陳趨北軍正北辰然後翼

翼乾乾尊尊親親立我蒸人聖考所以付天下之公器蹈汾陽之清塵唐雖舊邦其命維新古者振兵釋旅祠土祈穀先事也我是以幸太原祭汾睢耀金甲肅邊鄙虜馬警而不敢南向解嚴京師獲寶鼎獻宗廟戍人歸而盡務東作報福京坻於是乎爰佐五時郊天以奉時爰崇九室裕祖而敬思昭格遲遲神人允釐無何藉三脊盛六穗不召斯至擁休之類如山則委曷月而祕豈非享物降嘉司火也立渾同度在璿也陛下姑謂之薄臣所未諭且管氏訛齊帝王凡八十九湮淪鬱沒孰若致美我高宗勒岱甲子正六十胼蠻蕞蕘故能應期我神武惟繼代奉業增高保鴻缺乎中何也卽先后以權蹙阻于運二宗紹復未遑厥功神闇之契不在諸子而當聖躬固不可辭者審矣帝曰俞畏德之不稱而左輔右弼雜摺紳鴻碩之倫抱藜懷書蒸雲吐霧方集賢內殿講議前席以論之傳不云乎君子勤禮敬之至也易不云乎先王作樂豫以動也慎矣哉禮樂之爲用故執禮者具刪弊則質宜之自我變樂者

理去商何害謙以爲臣二者洽而三讓之制曰可始嚴鹵簿騰七萃啟禁關迴九重以聽乎鸞聲之雍雍匪疾匪徐物有其容動植讚華夷觀駢闐總擗羨漫半散出成皋踰滎波馮滑臺眺洪河遂並昆吾之墟徜徉乎大舜之澤瀕四瀆二濟入于究徑九一三齊喬於岱推二旬有六而頓行在莫不幡幡華皓如藿傾陽或牽以餼或捧之觴偃僂乎康莊一以伸神武之今日一以感乾封之舊章迺餼歸之觴舉之慈且惠而與之驩沸渭頡頏矧國鄒魯家洙泗乘汶野而圖記可知指泮林而頌聲不墜以周公之故將孔子之後翹然希王者之屬車聖人之清蹕則久及信宿之應巖巖所瞻宗神曰天齊王加一等於三事戶二十供王祀環十里禁人樵報也大禋旅之數重褒成之祿撫遺眈賜之復帝曰吁夫艱難繫王業休咎牽人事況天監之殊祥也殊典也不自滿而虔鞏于位朕寶臣曰乾曜洎說有初有終時乃風欽哉汝作朕左右丞相繫汝忠益以嘉猷補袞之闕罔或怠遂引天封煥天章篆介邱而旋

德陽大饗乎羣方程後代美其律聲其實墳作四而籍言七也臣
頌不敏繼伯夷之直清微太史之畱滯聆金奏同百獸之舞振木
鐸採萬人之詩敢陳詩以頌曰
天子聖兮天孫崇登以封兮報以功受命再惟皇代天之賚人所
載士馬山嶸戈矛山沓禎符山雜靈響山答天與人合我鋪衍兮
長粹清太元冊兮太一精休光光我之慶成舜四朝而禹萬國莫
之我京

文粹卷第十九下

文粹卷第二十

吳興 姚鉉 纂

頌三 總八首

神武

大唐中興頌

元結

鳳翔出師紀聖功頌

楊炎

大唐河西平胡聖德頌

平淮西雅

柳宗元

時政

聖政紀頌

來鵠

豐年

德勝頌

歐陽詹

祥應

歲星居心頌

權德輿

文粹二十

高世

伯夷頌 韓愈

大唐中興頌 并序

元結

天寶十四年安祿山陷洛陽明年陷長安天子幸蜀太子即位於靈武明年皇帝移軍鳳翔其年復兩京上皇還京師於戲前代帝王有盛德大業者必見於歌頌若令歌頌大業刻之金石非老於文學其誰宜為頌曰
噫嘻前朝孽臣姦驕為昏為妖邊將騁兵毒亂國經羣生失寧大駕南巡百僚竄身奉賊稱臣天將昌唐繫睨我皇匹馬北方獨立一呼千麾萬旗戎卒前驅我師其東儲皇撫戎蕩攘羣寇復服指期曾不踰時有國無之事有至難宗廟再安二聖重歡地闢天開蠲除妖災瑞慶大來克徒逆儔涵濡天休死生堪羞功勞位尊忠烈名存澤流子孫盛德之興山高日昇萬福是膺能令大君聲容泐泐不在斯文湘江東西中直涪溪石崖天齊可磨可鐫刊此頌

焉何千萬年

鳳翔出師紀聖功頌 并序

楊炎

舜有兩階之舞周有孟津之會皇帝有岐陽之蒐德莫勤乎安國勛莫配乎立極利萬物莫近乎去暴蓋受天元符與人請命冥契相合億兆有歸以唱則感神鬼之心以征則去雲雷之難維唐七葉姦臣犬盜於二京皇帝龍鳴於河北觀兵雍上建都發號以朝萬國心嚮天地志通幽明溘精四達大造立成於是巢山駕海之羣狼羸鳥章之君不期而趨于闕下者四十有三萬元帥廣平王俶太尉光弼司徒子儀等稽首言曰臣聞天啟聖以俟時聖感時而赴難非神功不能當大運非立德不能合人心故軒轅之道也伏蚩尤宗周之仁也稱襁負陛下之德大瑞於人和人和而動天天與和合氣百姓因之以獨化四夷因之以子來王師得之以貞勝意者河洛僭怨後東征之期人靈駿奔望西狩之禮天子方齊寶輅講金匱之書翌日霓旌武賁大車之輪黃鉞靈囿彤弓太阿

荆韓楚魏之廣七閩五貉之長金鼓百萬車徒九合大陣于東郊
皇帝建白麾以誓于軍中曰維高祖歆于上天四宗重光照臨下
土百有五十祀至于聖皇總武之干戈備文之法象葭爾逆虜敢
迷天紀盜我符璽黷我威靈使四海之內兵革縱橫肝腦塗裂旻
蒼降鑿錫命於予俾纘夏已墜之功寬堯未刑之族於戲余匪玉
帛山河是愛惟蒼生災害是憂匪天命威力是憑惟人心忠義是
保咨爾張目成天羅植髮成干櫓布和成將帥厲氣成風雲若作
進退爾惟旗鼓若斷首尾爾惟常蛇若戮鯨鯢爾惟干將若拯沈
溺爾惟巨艦夏有一旅之眾武有十人之暮志定金石信非盟誓
爾其念哉是時天威動六合兵氣連太白乾坤爲之坱軋河嶽爲
之震蕩彼狐鳴鑿齒之徒不崇朝而聲反於謳歌形歸於蹈舞者
幾過半矣故鄆杜之師以形勝灞上之克以威逐桃林之陣以奇
破河洛之孽以氣摧帝乃開天牢迴豹尾陵顛氣掃攬槍應龍秉
鉞立女侍坐乃考夏氏配天之義備漢皇建武之典雲髦玉輅山

動地踊降自西雍幸于京師萬姓前導百靈爲衛布德澤望陵寢
悲黍稷之將秀覽城闕之爲墟以雷雨洗川澤以皇風銷怨怒以
大賞議勤勞以成功告宗廟以祥刑去孽昧以惠政哀困窮清蹕
而奉聖皇稱觴以朝前殿於是東國耆老長安士庶排御路入天
庭動干門呼萬歲煙雲下遶林藪山迴神靈頌於堂精魄感於廟
王侯慶於國父子洽於家鍾石反於懸壘俎陳於席華戎踊躍喜
氣磅礴日退三舍天聲萬里神謀不得窺其奧天道不能後其時
斯一會之略也然後動變化爲鑪假仁義爲途陶氣象鑿耳目與
神合司契以道浸澆醜全犀象之形斷珠玉之脛然後以景星燭
夜甘露清氣昇闔風對天老捨鴻名以還太素乘大庥而統人紀
俾不思而降不祭而歆以元和感生渙古於是宰臣聚而言曰主
上以神武清難至德遂人崇助絕瑞光照萬古開闢日月于今六
年百姓豈忘力於帝乎人臣盍謝生於天平請相與鑿石於誓師
之場告成於得眾之地斯王道之盛典臣炎稽首敢獻頌曰

天命帝兮蕩妖昏交風雨兮會秦門惟聖德兮漫海外五單于兮
勇士會俗鳥獸兮家雲嶼越浮山兮泛青草徵羽騎兮列天營啟
金滕兮賜長纓日爲車兮雷爲鼓醢鯨鯢兮埽煙雨開明堂兮饗
文祖帝爲皇兮后爲母登雲臺兮冊玉府篆穹石兮駕終古

大唐河西平胡聖德頌

并序

維唐至德二年春正月武威郡胡洎九蕃夷落內伺師旅之閒外
合狼豕之兇據金城害州伯蛇變交戟之下炎焚大澤之中二月
乙丑皇帝以五命之服詔太僕崔倂總中權專上將誓軍前之士
卻城下之盟又命內常侍劉日新振鼓鐸之音護羌戎之長林竦
蝟合會于東郊粵庚午高牙大旆鐵馬長鑊歎以清笳陣以雲蛇
列于四衝蓬頭執戟鼓以靈鼉進于遠路趨悍獷狻虎裘蟻臂北
陵于土門之隊鈎車雲梯強弩堅楯齊傳于西烽之亭於是引熊
虎之師杖龍蛇之劍矛戟四起煙塵火色金鼓一振天地徘徊血
亂玄黃聲囂瓦屋是風雲皆入陣彼草木盡爲兵日月垂照於窮

鄉皇靈赫臨於天外名王貴馬大玉文具素女錦衣百金之產萬
井之資皆委于入貢之府布于有地之宮是時也千人踊萬人賀
美太階之符見頌偃伯之議興特進金城太守李萬頃洎五邑長
吏軍正大夫等言曰蓋聞王命先天以奉時賢臣合統以借運靡
乘乎帝籙不能撥亂罔應乎閒氣不得遭逢故大人之作必先靖
難以摧兇取暴爲治國以任賢杖能爲建功磅礴乎茅茨一作六之
下葳蕤乎玄古之上斯軒轅得之以勝蚩尤大夏得之以勝有扈
西伯得之去殷伐崇我太宗得之奄有遼海上皇得之克平巨猾
陛下得之再清宇宙埽蕩氛翳允若大唐之新命復高祖之天下
臣等恭惟六聖騰光百有五十祀周賁海寓鋪敷菌蠢丹穴之費
孤竹之君金廚括羽委命下吏陛下建大號纘鴻業歸勛祖禰昭
事聖皇是必天錫忠良佐成命器之臣所應皇運之統伏崇羽之
兇太康西人永永來裔願篆石誌美以爲頌云
詔虎臣兮燼天狐載火旗兮耀昆吾霽塵壘兮被戎都

臣某言臣負罪竄伏違尚書牋奏十有四年聖恩寬宥命守遐壤懷印曳紱有社有人云伏惟睿聖文武皇帝陛下天造神斷克清大憝金鼓一動萬方畢臣太平之功中興之德推校千古無所與讓臣伏自忖度有方剛之力不得備戎行致死命況今已無事思報國恩獨唯文章伏見周宣王時稱中興其道彰大于後罕及然徵於詩大小雅其選徒出狩則車攻吉日命官分土則崧高韓奕蒸人南征北伐則六月采芑平淮夷則江漢常武鏗錫炳燿盪人耳目故宣王之形容與其輔佐由今望之若神人然此無他以雅故也臣伏見陛下自即位以來平夏州夷劔南取江東定河北今又發自天衷克剪淮右而大雅不作臣誠不佞然不勝憤踊伏以朝多文臣不敢盡專數事謹撰平淮夷雅二篇雖不及尹吉甫邵穆公等庶施諸後代有以佐唐之光明謹昧死再拜以獻

平淮夷雅二篇

皇武命丞相度董師集大功也

皇者旨其武于濶于淮既徒既車環蔡其來狡眾昏嚚甚毒于醒狂奔叫呶以扞大刑皇咨于度惟汝一德曠誅四紀其猷汝克錫汝斧鉞其往視師是蔡人以宥以釐度拜稽首廟于元龜既類既禡于社是宜金節煌煌錫鏞彤戈犀甲熊旆成命是荷度拜稽首出次于東天子餞之疊聲是崇鼎臚俎載五獻百籩凡百卿士班以周旋既涉于滄乃翼乃前孰圖厥猷其佐多賢宛宛周道于山于川遠揚邇昭陟降連連我旆我旗于道于陌訓于羣帥拳勇來格公曰徐之無恃頌頌式和爾容惟義之宅進次于郟彼昏卒狂哀兇鞠頑鋒蝟斧螭赤子匍匐厥父是亢怒其萌芽以悖太陽王旅渾渾是佚是怙既獲敵師若飢得餽蔡兇伊窘悉起來聚石擣其虛靡愆厥慮載闢載祓丞相是臨弛其武刑諭我德心其危既安有長如林曾是謹譎化為謳吟皇曰來歸汝復相予爵之成國祚以夏墟度拜稽首天子聖神度拜稽

首皇祐下人 淮夷既平震是朔南宜廟宜郊以告德音歸牛休馬豐稼于野我武唯皇永保無疆

右皇武十有一章章八句

方城命懋守也卒入蔡得其大醜以平淮右

方城臨臨王卒峙之匪徼匪競皇有正命皇命于懋往舒余仁踏彼艱頑柔惠是馴 懋拜即命于皇之訓既礪既攻以後厥刃王師嶷嶷熊羆是式銜勇韜力日思奮殛 寇昏以狂敢蹈懋疆士獲厥心大袒高驤長戟酋矛粲其綬章右翦左屠聿禽其良 其良既宥告以父母恩柔于肌卒貢爾有維彼攸恃乃偵乃誘維彼攸宅乃發乃守 其恃爰獲我功我多陰謀厥圖以究爾訛雨雪洋洋大風來加于燠其寒于邇其遐 汝陰之茫懸瓠之峨是拔是震大殲厥家狡虜既縻輸于國都示之市人即社行誅 乃諭乃止蔡有厚喜完其室家仰父俯子汝水沄沄既清而瀾蔡人行歌我步透遲 蔡人歌矣蔡風和矣孰類蔡初胡瓢爾居式慕以

康為愿有餘是究是咨皇德既舒 皇曰咨懋裕乃父功昔我文祖惟西平是庸內誨于家外刑于邦孰是蔡人而不率從 蔡人率止惟西平有子西平有子惟我有臣疇允大邦俾惠我人于廟告功以顯萬方

右方城十章章八句

聖政紀頌 并序

來鵠

穆宗皇帝臨大朝與羣臣言奏政事羣臣退而宰臣奏曰陛下問及乎政事此三皇五帝之所徽美也陛下不問及史臣此三皇五帝之所弭己也徽美者將有乎聞也弭己者將有乎亡也以聞之而又亡之則陛下徒有宵衣旰食之名規天條地之績與羣臣言後若飈然拂冠過冕湮時銷日無得用於後譬如十夫樹楊一夫拔之無得以成其大也政事羣臣得陛下日間之是十夫樹楊也史官執筆為陛下日遠之是一夫拔楊也使後之人訝聖朝空晨虛夕閒殿曠廷無君臣咨謀洋溢之言乏社稷安危強讜之說是

不亦遠史臣致不載其事如拔去其楊將弭己之謂乎臣伏念貞
觀永徽之代百官之有耳目但聽視天子而已故言事者安論紆
詞無疑權慮勢史官執筆于階之下天子側旒于殿之上奏者發
誠于廷之中是以正衙一開則臣誠前而啟之帝旒近而鎮之史
筆隨而錄之由是君臣謀國圖政之事俞機都要之言詫業發神
豐編照物借籍于堯典差光于天陽至今見太宗文德若三皇五
帝之所徽美也自永徽之後宰執不正窺伺是忌針棘前後阻越
對敷狼噬虎狼持膏銜肉蓋以言多爲己曾不致君內廷失中畏
使人聽乃奏史官與百僚俱退然後宰臣請事由是君有問而宰
臣知之史官不得與於聞君有舉而宰臣謀之史官不得記其事
次第周行檢錄制誥與冗吏同工而已臣嘗涕泣以歎豈有以一
己之細一性之忌於黍稷圭景之間苟嗜急須迴天遮上使聖緒
神績有嘉敷善諷罔得聞於千萬年枉有謂明朝空晨虛夕閒殿
曠廷無君臣咨謀洋溢之言乏社稷安危強讜之說若今踵而承

之則不唯臣有障聰蔽睿之刺抑陛下雖有三皇五帝之所徽美
而若遠史臣則三皇五帝之所弭己也抑又有一夫拔楊之謂歎
臣請史官執筆當羣臣奏事隨日撰錄號爲聖政紀臣立朝荷祿
幸甚穆宗皇帝動宸領旒憮然歎曰吁朕罔敢粉名厥後乃罔知
厥後然聖人存簡策者亦非以粉名也蓋存乎大國之典鴻祖之
業我國有典我祖有業業在于典典在于史遏厥史不書是尸余
于祖涸業于典也朕纘承聖緒恭惟恪思將念厥政未嘗不離安
廢酣馳荒驚遠是以每與宰臣言如簇天下一巡省每見宰臣退
而展天下盡聞知豈圖臣蓄猾謀公無同事欲弄尾舌先衛巖穴
隔斥史臣占佞明后致懿搜嘉訪不存堯典之書善諷名猷莫出
清廟之什史臣負我不舉其官宰輔盡忠厥聞有此由是詔史職
執史筆立于廷之下錄君臣臚句之必行載剛毅進退之敢議題
其篇目曰聖政紀也至上之卽位三年有鄉校小臣來鵠居山澤
閒常私心重惜史臣以其史臣者是當國之鏡千億代之眉目也

因窺穆宗實錄得解憤釋嫉於立史官為聖政紀者追而頌出其

事以鑒今之廷列故拜獻其頌曰
三皇不書五帝不紀有聖有神風銷日已何教何師生來死止無
典無法頑肩界比三皇實作五帝實治成天造地不昏不圯言得
非排文德聖齒表表如見者莫若乎史是知朴繩休結正簡斯若
君詰臣箴觚編豪絡前書後經規善鑒惡國之大章如何寢略鳴
呼貞觀多叶永徽多俞廷日發論殿日發謨牙孽不作烏鼠其除
論出不蓋謀行不紆楹然史臣蛇然史裾瞠瞠而視透透而婁翹
筆當面決防納汗不枯爾智不席我愚執言直注史文直敷故得
粲粲朝典落落廷謨聖牘既多堯風不淺頌編坦軸君出臣顯若
儼見旒若俯見冕無閒殿曠廷無尸安素晏三皇不亡五帝不翦
太宗得之史焉斯展暨乎後相圖身天子專問我獨以言史不得
近邱明見嫌倚相在擯秉筆如今隨班不進班退史歸惘然疇依
奏問莫覩嘉謀固稀取彼誥命祿為國肥炯哉時皇言必及章德

室五帝道奧三皇如何翊臣嚙肉嗜盍背距磨快楅衡物長控截
僚位占護陽光垣私藩已遠史瘦唐俾德音嘉訪默縮暗亡咽典
噤法蓋聖籠昌曷以致此史文不張後必非笑將來否臧謂乎殿
空辰逸朝憎廷荒不知姦蔽文失汪洋有貞觀業有永徽綱亦匿
匪見亦寢匪彰賴有後臣知言不佞伊尹直心太甲須聖事既可
書史何不命乃具前欺大陳不敬曰遂史之喻請以物並且十夫
樹楊一夫欲競栽既未牢拊豈能盛帝業似栽逐史似拊穆宗慚
然若疚若營何昔臣斯隱我祖正不傳親問不寫密諍孰示來朝
以光神政由是天呼震岌徵奔召急史提筆來叱廷而入端耳抗
目不撓不挹獬多側頭螭蚪擺溼握管絕怡當殿而立君也盡問
臣也倒誠磊磊其事鏗鏘其聲大何不顯細何不明語未絕緒史
已錄成錄成謂何書政紀名伊紀清芬可昭典墳古師官鳥昔聖
官雲方之我后錄里書分錄有君法書有君文君法君文在聖政
紀云殿無閒時廷無曠日雲諏波訪倦編剗筆君劬臣勞上討下

述惟勤惟明在聖政紀出至德何比至教焉如孰窺孰則外夷內
儲謂君有道乎臣有謨歟有道有謨在聖政紀書一體列秩同力
翼戴析福去枚絕防無礙國章可披唐文可愛善咨不偷嘉論不
蓋不偷不蓋在聖政紀載諒夫總斯不朽可懸魏闕愚得是言非
訕非伐實謂鑿臣渾沌開君日月妖物零死天文光發惟我之有
頌兮奚斯躍而董狐蹙

德勝頌 并序

歐陽詹

唐貞元六年歲在庚午陰陽家流曰歲在午人馬食土人之所食
也穀馬之所食也草今言食土明歲無嘉穀而野無青草則運數
于茲合凶災之大者於是天尋舊步地轉恒軸交糾迴薄將有結
于常沴自春二月至于夏五月或赫日杲杲或密雲溶溶為焦灼
為霖霖似不日而至皇帝宿布大和人神鳥獸魚鱉咸若騰歡心
揚靈臺欣欣熙熙休氣中積浹磅礴浮蒼蒼潛相憂磨力強者勝
九陽構旱而莫展六陰作潦而不就氛祲靄為慶雲烈景曠為祥

光油油薰薰宛復如春塊不破而雨足條無聲而風暢日者青氣
欲凝淑氣猶競彼雖罔得為禍此亦未能為福徘徊相持時澤不
降五稼含萌而待藝百芳蓄穎以思坼至是土膏融甘液宣若決
停泉如開湧煙豐本增岐芄芄縣縣無磽壅與良沃獲一十於百
千贖蔬雲蠹以委圃餘糧嶽峙而栖畝夫體病不能害心心平必
能制體古人曰人者天地之心也既和且平則天地之病又焉得
成歟況奔走游泳之物曰靈曰祇之類皆吁歛怡逸於其中乎宜
其療乾元之宿疹愈坤元之常疾以至於交泰如斯之盛邪古先
帝王至聖則堯至仁則湯有黎毗以稱理歷水旱而莫禦豈不以
道未全洽而德尚涼哉皇帝非徒能禦之又易之為大慶殊祥其
於道德可謂充塞洋溢光今而邁古矣元鳴啞歌聖代者動天
殷地以夜繼晝而其詞未弘輒為頌二章用貽於康衢庶事明而
聲暢流乎無窮而以德勝目篇頌曰
歲在午天災于常昔人食土今我飫梁匪徒我飫梁鰥寡千箱盛

矣乎吾皇之德變青爲祥休哉德兮
歲在午天災斯屬昔馬食土今牛饜菽匪徒牛饜菽犬豕梁肉盛
矣乎吾皇之德轉禍爲福休哉德兮

歲星居心頌

并序

權德輿

皇上宅位六祀七政貞明於上七教敷聞於下其有不迪不吉不
庭不若之徒皆薰然而和晻然而化春三月司天氏奏歲星居心
宿五度其色黃明潤大光澤帝位積五十餘日詔下有司頒示中
外故臣得而言之以形歌頌謹案歲星五帝爲蒼五行爲木五常
爲仁五事爲貌天意若曰時以至仁爲理覆露萬民洽浹生類協
夫五行五事之用則發於星緯形於禎應陰陽大化昭報成功玄
符幽贊其昭昭如是禮運之論聖人曰以日星爲紀以四時爲柄
洪範之敘皇極曰斂時五福用敷錫厥庶人發於人格於天天人
交感合若符節其年秋平河中之寇葬其遺骸復其世祀班淮右
之師用弘文告用去武備此二帝三代所以恢合名也於是一統

類以昭德明法制以塞違薦禮百神賓懷曠俗嘉瑞美祥紛委狎
至置之而不有哲人端士連茹播職求之如已失然後端拱於穆
清怡神於靖冥驅一代爲純誠接萬靈於明庭斯又登邁邃古光
昭聞見巍乎紹天統物之盛者也微臣瑣賤沐浴仁聖敢獻歲星
居心頌一章以備周詩由庚由儀之闕頌曰

皇矣上帝降鑒下人后王承之制作禮文又用明德家尚孝仁人
無癘疵俗以阜蕃敷祐四方發爲天祥重華煌煌乃居明堂下煦
仁澤上爲祥光胙蠻感通天人攸同乃法五事乃建大中君君臣
臣德輝昭融保祐命之自天無窮微臣頌歌敢備唐風

伯夷頌

韓愈

士之特立獨行適於義而已不顧人之是非皆豪傑之士信道篤
而自知明者也一家非之力行而不惑者鮮矣若至于一國一州
非之力行而不惑者蓋天下一人而已矣若至于舉世非之力行
而不惑者則千百年乃一人而已耳若伯夷者窮天地亘萬世而

不顧者也昭乎日月不足以爲明舉乎泰山不足以爲高巍乎天地不足以爲容當殷之亡周之興微子賢也抱祭器而去之武王周公聖也率天下之賢士與天下之諸侯而往攻之未嘗聞有非之者也彼伯夷叔齊乃獨以爲不可殷既滅矣天下宗周彼二子乃獨恥食其粟餓死而不顧由是而言夫豈有求而爲哉信道篤而自知明也今世之謂士者一凡人譽之則自以爲有餘一凡人沮之則自以爲不足夫彼獨非聖人自是如此夫聖人乃萬世之標準也余故曰若伯夷者特立獨行窮天地亘萬世而不顧者也雖然微二子亂臣賊子接跡于後世矣

文粹卷弟二十

文粹卷弟二十一

吳興 姚鉉 饒

頌四 總一十首

古賢宰

慮子賤碑頌 賈至

良牧

廣州都督嶺南按察五府經略使宋公遺愛碑頌 張說

京兆尹張公德政碑頌 王維

唐衛尉卿洪州都督張公遺愛碑頌 崔祐甫

興利

潤州丹陽縣復練塘碑頌 李華

高陵令劉君遺愛碑頌 劉禹錫

蘇州嘉興屯田紀績碑頌 李翰

靈跡高道

唐天台山新桐柏觀碑頌 崔尙

唐中嶽體玄先生潘尊師碑頌 陳子昂

宗理

長明燈頌 高邁

虞子賤碑頌 弁序

賈至

清靜致理中庸之德至高明柔克簡易之體大釋微旨而徵遺論
 何先生道蔚其葳蕤者也先生宣慈在躬精義入神德順乎天性
 根於仁殷其如雷暖然如春始受業於仲尼終委質於魯君爾乃
 周道凌遲王風哀思夷狄竊於位號干戈亂於原野則我魯國無
 齊晉之強定哀非桓文之主三卿有僭虐之政先生處此亂邦從
 容理邑平心氣而全耳目晏然躋富壽之域焉自非知微知彰變
 化無窮孰能臻此觀夫為政之大體元之要恤孤哀喪舉事問弔
 訓之以悌加之以孝借五更而悟君賢三老而稟教然後燕居以
 佚其體張樂以和其人夜漁不戒而信欺吏不威而息是以宣尼

惜君之理小子期問君之政暇何其遠哉向使移於有國之君則
 陶唐之理也施於有政之臣則二南之化也昔舜左禹而右皋陶
 不下席而天下理周公殺膳在御不解懸而四夷伏小大則異其
 揆則同天寶初至始以校書郎尉于單父想先生行事徵其頌聲
 而古碑殘缺苔篆磨滅使立志之士何以揖其遺風焉嗚呼其道
 存而其事往其人亡而其政息哀哉遂作頌曰
 鳴琴湯湯虞子之堂清靜無為邑人以康澆風化淳霸俗致王誰
 謂陽鱗革而為魴皤皤黃髮或師或友芄芄麥苗不稂不莠齊師
 已卻魯俗斯阜諫或剖心伊人引肘穆穆伊人希聖之才堯舜既
 往孰為來哉從時卷舒與道徘徊游泳孔門取容定哀泱泱千古
 顯顯令德聲隨悠牧惠與順息人亡政弊道播神默寂寥夜川惆
 悵舊國荒祠尚埽苔篆將磷尋風聆韻想見其人年代邈殊精誠
 闡親再表貞石頌聲惟新

廣州都督嶺南按察五府經略使宋公遺愛碑頌

維唐御天下九十有八載蒼生賁乎海隅立澤漫乎荒外天子念窮鄉之僻陋微道之脩阻吏或不率不馴人或不康不若乃命舊相廣平公宋璟鎮茲裔壤式是南州篤五管之政教總三軍之旗鼓幅員萬里馴致九譯詔書下日靡然順風曷由臻斯威名之先路也公曩時執白簡登瑣闥推誠謇諤不私形骸忤英主之龍鱗踰奸臣之虎尾挫二張之銳則聲恒震域折三思之角則氣蓋風雲由是極有四星維帝之輔地有五嶽維天之柱其入宰也君之股肱其出守也人之父母至於此邦之長人也飲食有節衣服有常清心而庶務簡正色而羣下一瑟兮憇兮赫兮諠兮固以不怒而威不言而信雖有文身鑿齒被髮儋耳衣卉麩木巢山館水種落異俗而化齊言語不通而心喻矣其率人版築教人陶瓦室皆敷墍晝遊則華風可觀家徹茅茨夜作而災火不發棟宇之利也自今始祖國之舶車海琛雲萃物無二價賂有遺金殊裔胥易其

迴途遠人咸內我邊郡交易之坦也有如此故能言之士舉爲美談蓋微子去殷以後王者襄公伐楚將得諸侯尙書東漢之雅望黃門北齊之合德宋氏世名公其濟美詩所謂無念爾祖聿脩厥德廣平有焉若夫往者屈也來者伸也往來相召而哀樂繼之鴻飛遵渚於汝信處龍章袞衣以我公歸鬱陶乎人思嗟歎之不足廣府司馬譚瓌番禺耆老某乙等相與刻石傳徽斯文予春秋之徒也豈將苟其辭哉雅敬宋公王臣之重次嘉譚子贊德之義遙感耆舊去思之勤越裳變風知周公之才之美吉甫作頌見申伯于藩于宣觀政將來惡可廢也頌曰

降王宰兮遠國靈歌北戶兮舞南溟酌七德兮考六經政畫一兮言不再草木育兮魚鼈寤變蓬屋兮改籬牆魚鱗瓦兮鳥翼堂洞日華兮皎夜火光莫炖兮風莫颺事有近兮惠無疆崑崙寶兮西海財幾萬里兮歲一來舟如島兮貨爲臺市無欺兮路無盜旅忘家兮扃夜開越井岡兮石門道金鼓愁兮旌旆好來何暮兮去何

早爆牛牲兮茵雞卜神降福兮公壽考

京兆尹張公德政碑頌

井序

王維

雲從龍風從虎氣應也聖人作賢人輔德同也君臣同德天地通氣以康九有以遂萬類惟皇御極二十載光格四表至于海隅日出越小大邦蠻貊師長罔不欽于成憲以承天休然天子猶日省三接列辟日聽萬方輿頌懼人有未化賢有未登故敷仄陋兼乎十等選宗室及乎九族任事以觀材積時以觀行乃得我賢京兆焉夫京兆號為難理清淨病於不給刀筆拘於守文或以軟弱廢或以賊殺劾把宿負淺為丈夫用鉤距蓋非長者我則異於是大道難名大理無法閉關於任數巧算不能知堅壁於畫一善攻不能下摧宿豪如薙草無愠色視大權如厯塊無傲容百司之吏總一德以咸服五方之人雜異教而同理受命之始先聲已振黠吏惡少聞風族行及乎鳴騶詣府登堂坐定縣尹掾史以次上謁守正之人其氣高含章之人其詞大見容色而聞號令小人戚而君

子秦日者櫟陽男子閭里為豪借客報仇聚人為盜或白日手刃或黃塵袖椎政寬則以身先諸偷操急則以事中長吏貳過不已萬計自脫公命吏縛之立死鈴下於是人人闔室若遇大寶焉前年不登人頽太甚野無遺秉路有委骨天子不忍征於不粒賦於無衣六軍從衛以臨東諸侯息關中也帝曰咨天其降威人罔畏罪台恐寇盜乃邑矧曰蕩析離居惟爾克濟撫茲西土公拜稽首思塞休命布慈惠之政不以利淫震雷霆之威其或有過饗人減雙雞之膳圉人省五馬之秣陶不獻服巧不填館自身已往振廩同食雖人煙不動道饑相望不思濫以苟生咸守教以就死是不可能也先是王公或專南山之利司農涸昆明之池收赤岸澤將為田以便官至是悉奏罷之舟鮫衡麓之守廢蒲荷薪蒸之產入自郊徂邑室有魚殮斬陰伐陽市多山木人得以瞻惟涇有防比歲多決近縣疲於力役他山匱於度材公命刮朽壤填巨石辦大木去編菅其始告勞乃終有慶匠石日減功萬藏史日省錢億農

始學未女始安織於是始背黃髮之耆曰我有田疇鍾秉其畝我有子弟顏閔其行鄉黨以睦惇失其獨道路有禮汰無與爭酒先養老賄不問吏既無吠狗亦無奸人臨年餘資竊蒙惠化其曷以臻茲君子曰此天子至公內舉不避親錫汝明尹張公之力也夫公於國爲外戚於帝爲外弟重組累印珥香貂者七葉奉車駙馬乘朱輪者十人勝衣則綺襦紈袴通籍則玉墀青瑣動則兩驂如舞坐則五鼎成列文軒楚製素女趙舞而公儼兮其若容澹兮其無味心在四教語稱七德目視六籍口誦九歌懷君子令德之忠保詩人錫類之孝悌有過於共被慈有踰於含食惡衣以居公服不敢降也屈體下士王綱不敢替也協二姓之好以正人倫傍無嬖御分一人之憂以審官政下多英傑若夫皇帝敬問之詔御札自書天王命賜之衣上官所製勞勤則中使接武計議則走馬來朝豈惟眾臣重其經術爲吏雜以儒雅而已且公之德升聞于天非一朝一夕之漸也亦以稱職於累官著聲於所在其丞祕書也

闕文遺簡多在大家深爲子孫之藏密有緘滕之固公不憚權貴或抵或誘盡歸天閣官書備焉其牧郢也人有不若德戮之不爲暴人有不保居撫之不爲詔存者考其事壯其食以畜之行者緝其宮藝其樹以待之此邦之人旣優他邦之人又至焉未盈一歲遂增萬戶其守汾也仍歲大旱郡祠介推雖屢舞僊僊而靈應未若公命束緼取火伐樹寘薪醜酒而祝曰有功於人祀爲明神無德而祿禍亦覆餗自絳已來人實祀子純犧大璧不敢愛必以薦也童兒季女不敢躐必以敬也神旣靡咎人將安仰若亭午而雨則樹其鷺羽執此駢毛不然者火燎將至焮天鑠地靈衣且爲煨燼豐屋將爲茂草爾其圖之言未畢而雲興拜未起而雨降周於闔境不入他郡雖封疆咫尺而彼竭我盈嘻若記能事載盛德渭川之竹不足簡終南之木不足軸夫訓人至於禮義曰德安人免於阡危曰功德德者上賞於上下頌於下長老孜孜願刊于石以予學於舊史來卽我謀且維與人編戶與人爲伍與人出入與人

言語知風俗之淳弊識政化之原本屬詞媿文書事蓋實詞曰
 五代相韓七葉侍漢及我聖朝亦生邦翰大道無形貞蠱以幹含
 章不耀在割能斷情偽萬端吾道一貫帝選賢尹無以易張金印
 紫綬京兆之章佩我鳴玉冠我兩梁天子休命拜首以將寬而愛
 人立滅暴強明明天子哀此南畝將息西人遂覲東后我教我訓
 我鎮我守茫茫三秦則罔餽口守死以義徇生不苟王曰外弟視
 人不佻何以寵之手書以詔何以問之賜衣而朝俾人華胥致君
 帝堯刻石作頌永世彌昭

唐衛尉卿洪州都督張公遺愛碑頌 并序

崔祐甫

今天子終諒闇易月之期不言既言之日詢于師保輔弼之臣曰
 將以國之明燭震下土俾兆人康乂有道哉四臣曰莫如擇賢而
 司牧之雖欲不理不可得也上曰用賢何先四臣曰莫先於幽遠
 蠻貊之邦為急也即日命王人遽以制書就拜衛尉卿兼洪州都

督張公為御史中丞廣州刺史嶺南節度經略觀察等使既踰月
 而遽屆于洪洪之耆老嫠孀商販漁釣百類千品周聲奪魄于野
 于塵咸曰寧取我裳而裂之寧取我廩而焚之父也天只胡為奪
 我之君中丞受命而南舟不及汎馬不及秣國人懷慕之罔極曰
 清塵遠矣君不顧矣鬱陶之思何用哉蓋用於揚名頌德乎故吏
 兵曹參軍張擢法曹參軍豫章縣令鄭鋒建昌縣令盧惟瑾新吳
 縣令鄔賁州人東冶府果毅劉容者壽喻乾相等討論之眾僉謂
 允於心曰自昔為政者知清之可以長人也而清者稀豈不欲清
 欲牽之也欲之所行不廉不儉為之舟輿也清之不立肆奢崇貨
 為之鑽鑿也於是撤其帷帳薦蓐之具便於身悅於目者二百餘
 物歸之有司減其俸錢稍食月幾十萬實於軍府此皆前政之所
 督觀而封己者我則推而遠之於是公儀之義申平仲之規見矣
 二之日謀於眾曰昔曹參去齊以獄市為寄以為擾於獄者輕重
 人之命煩於市者耗斲人之生苟鞭笞桁楊之無度侵牟肆奪之

不改是國家以章綬印璽毒蒼生也豈致理哉於是平百貨之貴賤議刑罰之等差使其貪不下殘忿不私逞韓子求環而不可使人袒背而無傷夫然噬嗑之象成行葦之恩溥矣三之日謀於野曰不稼不穡民天安仰載馳載驅王命所急吾觀是邦農野未闢傳置未修豈不以使役無期供億失序儻野有餓殍實不如歸亦諸侯之恥也於是減承城吏卒幾三千歸之隴畝而擊柝之守無闕焉賦豪富帶財數百萬調于館餼而含糗之徒不知也其卒也不公之吏留以爲廝其財也不法之臣受以潤屋我皆用之於愛人活國也於是阜藩之望崇多大之儀備矣從政三月州人愛之如父母承之如松柏夫婦耕織之暇無他懼惟懼公速遷其餘煦嫗孕育發於中而形於言損其身而益於物可以激積俗慰窮甿者豈勝道哉祐甫山東鄙人不好妄飾凡所聞見務存實錄故採拾而書之公名休字祥幽州范陽縣人有晉司空茂先之遠裔也曾祖汲易州長史祖選幽州固安縣丞考價贈齊州司馬公起家

石亭別將自是爲縣令軍司馬州長史各一人爲天子友儲君臣雖假以寵名而跡實戎索受命爲范陽節度安祿山判官祿山以大權大寵外示忠而內謀逆太上皇推赤心而勿疑敢有間之者死蹈虎尾犯龍鱗公密言其戎狄豺狼不可厭也當是時也視鼎鑊如歸焉神之聽之是與正直周旋鋒鏑之下出入寇讎之間而能終保元吉漸于貴仕進退存亡而不失其正其惟張公乎又牧濠舒潤三州而及此昔張黃門庭珪牧此州甚得人譽張丞相九齡次之逮府君又有裕焉故邦人有三張之目頌者美盛德之形容非魯僖公仲山甫不之獲今茲頌曰昔爲豫章故有循良黃門之善于今不忘爰及丞相亦有烈光我君戾止是爲三張立廉寶儉無怨無傷郵亭之下賓旅其康四封之內望歲千箱自春徂夏兮人相慶慶未畢兮聞後命朱轡玉節兮向番禺彼願適兮我望孤君乎君乎若歲大旱其誰見濡

潤州丹陽縣復練塘碑頌

并序

李華

大蜡之祭辭曰土反其宅水歸其壑先王因流下而導之故曰九川滌源因迤匯而瀦之故曰九澤既陂以疏天地之氣以利元元之用崇伯汨五行而殛羽山臺駘障大澤而封汾川洪範首之春秋載之地有廣狹事無今古大江具區惟潤州其數曰練湖幅員四十里菰蒲菱芡之多龜魚鼈蟹之生厭飫江淮膏潤數州其傍大族強家泄流爲田專利上腴畝收倍鍾富劇淫衍自丹陽延陵金壇環地三百里數合五萬室早則懸耜水則具舟人罹其害九十餘祀凡經上司紛紜與奪八十一斷嗚呼曲能掩直強者以得之老幼怨痛沈聲無告永泰元年王師大翦西戎西戎既駟矣生人舒息詔公卿選賢良先除二千石以江南經用所資首任能者是歲十一月二十三日拜前常州刺史京兆韋公損爲潤州聲如飈馳先詔而至吏人畏伏男女相賀卽日上無貪刻下無冤憤公素知截湖開壤災甚螟螣臨事風生指期以復羣謗雷動山鎮恬然中明獨裁文之以禮乃白本道觀察使兼御史中丞韋公元甫

中丞撫掌愜心如公之謀且曰興利除害得其人而後行非常之政敢歸叔父公乃申戒縣吏卒徒闢之人不俟召呼扞從役畚鍤蓋野浚阜成蹊增理故塘繚而合之廣湖爲八十里象月之規儔金之固水復其所如鯨噴射洶洶隱地雷聞泉中先程三日若海之彌望灑灑如吞吐日月沈沈如韞蓄風雨所潤者遠原隰皆春耕者飽憂者泰於是疏爲斗門旣殺其溢又支其澤沃壻均品河渠通流商悅奠價人勇輸賦遐邇受利豈惟此州每歲萌陰乘陽二氣相薄大雨時行羣潦奔流水勢所入盈而無傷龍見方雩稼蒙其渥時前相國彭城公劉尙書晏統東方諸侯平其貢稅聞而悅之白三事以聞詔書褒異焉彭城公宣命至江南捧詔授公公率元僚掾史令丞已下至于耆艾西向拜手忻戴皇明人心上感天降嘉澤如有神祇昭協厥志公正直而和專靜而斷嫉惡宥過惠人察奸純鈞精堅百鍊不耗伐冰之貴降從士禮詩云靖恭爾位好是正直宜其享多福也吏人人賀公拱而謝之曰尙書劉公

觀察韋公奉行王澤也鄙何力之有焉丹陽令杜孟寅秉公之清白延陵令李令從如公之愛人金壇令胡玘稟公之成規及丹陽耆壽周孝瓌百姓湯源等拜手而請曰兒爲澤兌悅也水歸於澤而澤悅於人百年浸塞而公啟之臣哉鄰哉克諧帝休永代是式三縣無災若不碣而刻之則王命不揚於厥後後之人無以倚負也華嘗學古見訪爲頌頌曰

望沄沄兮視冥冥烏閒魚樂葭菼生膏腴利倍起訟爭斯人怨抑痛無聲韋公正直動神靈百年淤淀爲滲清飢者飫兮病者寧詔書光寵恩霈榮劃然眊眊復皎明追琢刻頌揚棗馨

高陵令劉君遺愛碑頌

并序

劉禹錫

縣內之大夫鮮有遺愛在其去者蓋邑居多豪政出權道非有卓然異績結于人心浹于骨髓安能久而愈思大和四年高陵人李仕清等六十三人具前令劉君之德詣縣請以金石刻縣令以狀申于府府以狀考于明法吏吏上言謹按寶應詔書凡以政績將

立碑者具所紀之文上尙書考功有司考其詞宜有紀者乃奏明年八月庚午詔曰可令書其章明有以結人心者揚揚于道周云涇水東行注白渠醜而爲三以沃關中故秦人常得善歲按水部式決洩有時畎澮有度居上游者不得擁泉而顛其腴每歲少尹一人行視之以誅不式兵興已還甯失根本涇陽人果擁而顛之公取全流浸原爲畦私開四寶澤不及下涇田獨肥他邑爲枯地力旣移地征如初人或赴訴泣迎尹馬而占涇之腴皆權倖家勢足以破理訴者覆得罪繇是咋舌不敢言吞冤銜忍家視孫子長慶三年高陵令劉君勵精吏治視人之瘼如癩疽在身不忘決去乃循故事考式文暨前後詔條又以新意請更水道入于我里請杜私竇使無棄流請遵田令使無越制別白纖悉列上便宜掾吏依違不決居二歲距寶厯元年端士鄭覃爲京兆秋九月始具以聞事下丞相御史御史屬元谷實司察視持詔書詣白渠上盡得利病還奏請規中上以谷奉使有狀乃俾太常撰日京兆下其符

司錄姚康士曹掾李紹實成之縣主簿談孺直實董之冬十月百
眾雲奔憤與喜并口謠手運不屑磬鼓揆功什七八而涇陽人以
奇計賂術士上言白渠下高祖故塹在焉子孫當恭敬不宜以畚
鍤近阡陌上聞命京兆立止絕君馳詣府控告具發其以賂致前
事又謁丞相請以顙血汚車茵丞相彭原公斂容謝曰明府眞愛
人陛下視元元無所恪第末周知情僞耳即入言上前翌日果有
詔許訖役仲冬新渠成涉季冬二日新堰成駛流渾渾如脈宣氣
蒿荒漚冒迎耜釋怨開塞分寸皆如詔條有秋之期投鍤前定孺
直告已事君率其寮躬勞徠之烝徒譁呼奪襁襖而舞咸曰吞恨
六十年明府雪之適奸犯豪卒就施爲嗚呼成功之難也如是請
名渠曰劉公堰曰彭城按股引而束千七百步其廣四尋而深半
之兩涯夾植杞柳萬本下垂根以作固上生材以備用仍歲旱沴
而渠下田獨有秋渠成之明年涇陽三原二邑中又擁其衝爲七
堰以析水勢使下流不厚君詣京兆索言之府命從事蘇持至水

濱盡撤不當擁者繇是邑人享其長利生子以劉名之君諱仁師
字行輿彭城人武德名臣刑部尙書德威之五代孫大厯中詩人
商之猶子少好文學亦以籌畫干東諸侯遂參幕府歷尹劇縣皆
以能事見陟率不時而遷既有績于高陵轉昭應令俄兼檢校水
曹外郎充渠堰副使錫朱衣銀章計相愛其能表爲檢校屯田郎
中兼侍御史幹池鹽于蒲錫紫衣金章歲餘以課就加中執法理
人爲循吏理財爲能臣一出于清白故也先是高陵人蒙被惠風
而惜其捨去發于胃懷播爲聲詩今采其旨而變其詞志于石文
曰
噫涇水之逶迤漑我公兮及我私水無心兮人多僻錮上游兮乾
我澤時逢理兮官得材墨綬纒兮劉君來能愛人兮恤其隱心旣
公兮言旣盡縣申府兮府聞天積憤刷兮沈痾痊劃新渠兮百畎
流行龍蛇兮止膏油遵水式兮復田制無荒區兮有良歲嗟劉君
兮去翱翔遺我福兮牽我腸紀成功兮鑄美石永信詞兮昭懿績

禹平九土溝洫之功大棄粒蒸人稼穡之務重自古有國家未嘗不率由斯道底慎其業故登平足以厚生殖禍難足以定凶災未有易此而能理者自羯戎亂常天步多艱兵連不解十有四年因之以飢饉重之以天札死者暴露亡者惰遊編版之戶三耗其二歸耕之人百無其一將多於官吏卒眾於農人古者八家爲鄰一家從軍七家從之猶曰興師十萬內外騷動不得操農桑者七十萬家今乃以一夫家食一伍一餘子衣一卒師將不立人將不堪此聖上所以旰食宵興求古今令典可以濟斯難者莫出乎屯田廣德初乃命相國元公昌其謨分命諸道節度觀察都團練使統其事擇封內閒田荒壤人所不耕者爲其屯求天下良才善政以食爲首者掌其務屯有都知羣士爲之都知有治卽邑爲之官府官府旣建史胥備設田有官官有徒野有夫夫有任上下相維如郡縣吉凶相恤如鄉黨有誅賞之政馭其眾有教令之法頒于時

此其所以爲屯也雖天子命之股肱贊之至於宣上命齊下力經地域制地事辨土宜均土法簡穡器修稼政陳三壤之種而敬其始考九農之要而成其終則都知之職專達其事焉詎可以非其人哉浙西觀察都團練使御史中丞兼吳郡守贊皇公王國大賢憂公如家慎擇厥官以對明命浙西有三屯嘉禾爲之大乃以大理評事朱自勉主之且揚州在九州之地最廣全吳在揚州之域最大嘉禾在全吳之壤最腴故嘉禾一穰江淮爲之康嘉禾一歉江淮爲之儉公首選於眾獨當其任有寬簡惠和之德知艱難勤儉之事政達乎本智通乎時仁愛足以結下機權足以成務嘉禾土田二十七屯廣輪曲折千有餘里公畫爲封疆屬於海濬其畎澮達于川求遂氏治野之法修稻人稼穡之政芟以殄草剔以除木風以布種土以附根頒其法也冬耕春種夏耘秋穫朝巡夕課日考旬會趨其時也勤者勞之惰者勗之合耦助之移田救之宣其力也下稽功事達之于上上制祿食復之于下敘其勞也至若

義感於內誠動於中徇國忘家恤人猶己野次露宿簞食瓢漿盡
四體之勤趨一時之役大寒栗烈而猶執鼓盛暑赫曦而不傳
車蓋如登高去梯與之死生投醪均味忘其飢渴然後知仁義之
政必見於耕穫井田之法可施於甲兵夫如是人將竭其力地將
盡其利天將與其時自贊皇爲郡無凶年自朱公爲屯無下歲元
年冬收入若干斛數與浙西六州租稅埒朝嘉厥庸授廷尉評公
又稽氣授時如前代法有白雀集于高豐屯廩蓋大穰之徵也屯
官某乙等聚而稱曰初公爲屯人有二懼焉邑人懼其暴屯人懼
其擾今溝封犬牙而不相侵疆場日履而人不知方舟而上以饋
師旅此功及於國也登量而入以寬征稅此德加於人也古者智
效一官政修一鄉猶歌之詠之手之足之況朱公之績如此其大
者乎遂相與斲琬琰表阡陌南陽太守豈專刻石之功桐鄉嗇夫
終踐大農之位其辭曰
茫茫九區陽九躔災邱荒瘡札田卒污萊天步未移連師滿野不

耕不穫仰食于下嗷嗷遺人餬口饋軍帝曰予憂爰立其屯且戰
且耕古之善經辟師肅祇王命是聽嘉禾之田際海茫茫取彼榛
荒畫爲封疆朱公莅之展器授方田事旣飭黎人則康我屯之稼
如雲漠漠夫伍綦布溝封綺錯朱公履之勸耨趨穫根莠不生螟
螣不作歲登億計征寬稅薄息我蒸人遂其耕鑿我屯之庾如京
如坻嘉量是登方舟是維贊皇獻之達于京師飽我六軍肅將天
威畎距于溝溝達于川故道旣堙變溝爲田朱公濬之執用以先
浩浩其流乃與湖連上則有塗中亦有舩旱則漑之水則泄焉曰
雨曰霽以溝爲天俾我公私永無飢年公田翼翼私田兢兢不侵
其畔不犯其穡我倉旣盈爾廩維億屯人熙熙邑人怡怡不擾其
務不干其時我無爾暴爾無我欺我有官屬朱公訓之我有徒侶
朱公恤之我有眾役朱公率之我有微功朱公序之起於田中印
綬纍纍何以況之福祿如茨何以久之刻篆于碑

唐天台山新桐柏觀碑頌

井序

崔尙

天台也桐柏也代謂之天台真謂之桐柏此兩者同體而異名同契乎玄道無不在夫如是亦奚必是桐柏邪非桐柏邪因斯而談則無是是非非矣而稽古者言之桐柏山高萬八千丈周旋八百里其山八重四面如一中有洞天號金庭宮即中右弼王子晉之所處也是之謂不死之福鄉養真之靈境故立觀有初強名桐柏焉耳古觀荒廢則已久矣故老相傳云昔葛僊翁始居此地而後有道之士往往因之壇址五六厥迹猶在洎乎我唐有司馬練師居焉景雲中天子布命于下新作桐柏觀蓋以光昭我立元之不烈保綏我國家之永祉者也夫其高居八重之一俯臨千仞之餘背陰嚮陽審曲面勢東西數百步南北亦如之連山峩峩四野皆碧茂樹鬱鬱四時恒青大巖之前橫嶺之上雙峰如闕中天豁開長澗南瀉諸泉合漱一道瀑布百丈懸流望之雪飛聽之風起石梁翠屏可倚也琪樹珠條可攀也僊花靈草春秋互發幽鳥清猿晨暮合響信足賞也始豐南走雲嶂閒起剡川北通煙岑相接

東則亞入滄海不遠蓬萊西則浩然長山無復人境總括奧祕鬱為秀絕包元氣以混成鎮厚地而安靜非夫神與僊宅僊得神營其孰能致斯哉故初構天尊之堂晝日有雲五色浮靄其上三井投龍之所時有異雲氣入堂復出者三書之者記祥也然后為虛室以鑿戶起層臺而壘土經之殖殖成之翼翼綴日月以為光籠雲霞以為色花散金地香通玄極真侶好道是遊斯息微我練師孰能興之練師名承禎一名子微號曰天台白雲河內温人晉宣帝弟太常馮之後祖晟仕隋為親侍大都督父仁最唐興為朝散大夫襄州長史名賢之家奕代清德慶靈之地生此仙才以為服冕乘軒者寵患吾身也擊鐘陳鼎者味爽人口也遂乃捐公侯之業學神僊之事科籙教戒博綜無所遺窈冥夷希微妙詎可識無思無為不飲不食仰之彌峻巍乎其若山挹之彌深湛乎其若海夫其通才練識瞻學多聞翰墨之工文章之美皆忘其所能也練師蘊廣成之德睿宗繼黃軒之明齋心虛求將倚國政侃侃然不

可得而動也我皇孝思維則以道理國協帝堯之用心寵許由之高志故得放曠而處逍遙而遊聞練師之名者足以激厲風俗睹練師之容者足以脫落氛埃以慈爲寶以善救物神以知來智以藏往允所謂名登仙格迹在人寰奧不可測已夫道生乎無名行乎有情分而作三才播而作萬物故爲天下母修之者昌背之者亡故爲天下貴況絕學無憂長生久視也哉道之行也必有階也行道之階非山莫可故有爲焉有象焉瞻於斯仰於斯若舍是居教將奚依損之又損之以至於無爲玄門旣崇不名厥功朝請大夫使持節台州諸軍事守台州刺史上柱國賈公名長源有道化人有德養物嘗謂別駕蔡欽宗等曰且道以含德德以致美美而不頌後代何觀乃相與立石紀頌以奮至道之光其辭曰
邈彼天台嵯峨崔嵬下臨滄海遙望蓬萊漫若天合呀如地開煙雲路通眞仙時來顧我練師于彼瓊臺練師練師道人玄微喻日安坐凌霄欲飛興廢靈觀練師攸贊道無不爲美哉輪奐窈窕茫

茫通天降祥保我皇唐如山是常

唐中嶽體玄先生潘尊師碑頌

并序

陳子昂

尊師業尙冲密勤志幽深理心事天所保唯齋絕聖棄智不耀其光故眞感冥期珍圖祕學性與天道不可得而聞也若乃崇標曠迹遐情遠思志摩青雲蓬視紫闈高宗每降鑾輦親詣精廬尊師身不下堂接手而已每歎曰大丈夫業於道不能投身霄嶺滅景雲林而疲痾此山以煩世主吾之過也遂欲東求蓬萊孤舟入海屬天皇敦篤斯道祈款逾深躋躋山隅絕策未往旣而金革有命鏹轡遺區於戲昔姑射有神人堯輕天下崆峒有至道軒屈順風玄眞高蹤萬古同德何其盛哉尊師有弟子十人並仙階之秀然鸞姿鳳骨眇曖雲松者唯穎川韓法昭河內司馬子微皆稟訓瑤庭密受瓊室專太清之業遺下仙之儔谷汲芝耕服勤於我蓋歷歲紀也始尊師受籙於茅山昇玄王君王君受道於華陽隱居陶公陶公至于微二百歲矣而玄標仙骨雅似華陽夫偕眞蹈冥鍊

景遊化者其心必有類乎法昭等永惟尊師靈迹洞業高深邁古
而棄代往矣其若之何乃斲石幽山勒頌立德其辭曰
觀元化兮求古之列仙得瑤圖與金鼎信元符之自然神與道而
惟一天與人兮相連苟精守以專密必駕景而凌煙丹邱不死兮
羨門子黃宮度世兮吾體立體立之至德兮洵淑美沖心養和實
元始初學茅山濟江水乃入華陽洞天裏道逢真人兮昇立子授
以寶書青苔紙令守嵩陽玉女峰雲棲窮林今五紀聖人以萬機
爲貴而我以天下爲累聖人以大寶爲尊而我以天下爲煩是以
冥居於喂噪寄遺迹於軒轅有唐高宗兮天子之光好道樂仙兮
思彼雲鄉千旌萬騎兮翠鳳凰遊遊汝海兮箕山陽朝拜白茅夕
紫房齋心絜意緬相望祈問玉真及玉皇何以得之受天昌黃庭
中人在子身窈窕冥冥精甚真去汝驕氣與淫神勤能思之道自
親遂解形而遺世乘白雲而上賓弟子不知其所往乃刻石以思
其人

長明鐙頌并序

高邁

萬婁之目處闇室或不能覩鐙處之皎如也澄公之掌在玄夜或
不能照鐙在之了如也故大雄氏以方便力救黑暗界藉其光誘
其人佛所以有然鐙名法所以有傳鐙義大抵長明鐙是其蘊乎
夫日主晝太陽之精中則昃昃則沒我長明鐙不沒月主夜太陰
之精滿則虧虧則盡我長明鐙不盡日月尙爾況小光小明哉要
自積苦爲海舉足見溺積邪爲山舉手見礙竟不能髣髴之或髣
髴之不克成就之言之可爲長歎我邑中有俊傑主此然鐙精進
成就於寶融寺經藏院且夫蘭炷爇火吾見其盛未見其微也鐵
盆盛膏吾見其增未見其減也一籠而四時長花滿室而終歲不
夜人見之者一作禮眼蒙利再作禮心蒙爽心眼自相照了內外
由是洞徹然則終日見鐙未嘗見鐙終日不見鐙未嘗不見鐙夫
達觀者乃如是也意者不獨於此直上照一天二天乃至三十三
天無門不闢恒沙善人由茲而入直下照一地二地乃至一十八

地有獄皆開多劫罪人由茲而出若然者四維上下虛空可思量
 不可思量邪我長明鐙實相功德亦復如是邁三數年內願銘頌
 之閒迫賤事未構斯文一朝染目疾朦朧而不自審從何得也遂
 夢神人語邁曰子於長明鐙其有負乎邁應聲而寤寤而起起而
 作頌明日目愈頌曰
 見外鐙長明見內鐙長明萬惡自光中滅萬善自光中生不見一
 鐙百千萬億鐙乃至於無窮不見一人百千萬億人歸之於大同
 空卽是色色卽是空弟子作頌允執厥中

文粹卷弟二十一

